


# UBULUBULO

## UKUPITILA MU MAKWA

 Natotela, mukwai. Icungulo mukwai, mwe banandi. Lyena lishuko ukuba muno muno bushiku, ukulanda naimwe nakabili mwi Shina lyakwa Shikulu wesu uwatemwikwa Yesu Kristu. Kabili lyonse lishuko ukukumanya abantu bakwa Lesa, ukuli konse, kabili ukulanda pali lilye Shina ilikalamba, Yesu.

<sup>2</sup> Ine mucine ndetotela palwimbo munyinefwe afumine mukwimba. Ulo, ulo elwimbo natemwisha. Mubushiku ubo bena baleesha ukupanga Yesu ukubafye kasesema, nangu umuntu umusuma, nangu kafundisha, ico mucine cifumya Bulesa Bwakwe, ifyo Ena aali. Kabili Ndecetekela ukutila Aali . . .

<sup>3</sup> Takwatalile akubako Umo nga Ena, pesonde, takwakatale akuba. Ena aali ni Emmanuele. Ena aali ni Alifa, Omega; ukutendeka kabili nempela; Uyo uwali, uuli, kabili uukesha; u Mushila kabili u Bufyashi bwakwa Davidi; u Lutanda lwa Lucelo. Muli Ena mwaikela bu Lesa. Muli Ena mwali Lesa.

<sup>4</sup> “Lesu aali mu Mwana Wakwe, muli Kristu, ukuwikisha isonde ku Mwine.” Yesu atile, “Te Ine neulecita imilimo, lelo ni Taata Wandu uwikala muli Ine. Taata Wandu na Ine twaba umo,” Lesu ukulengwa ukumonekela, mumubili. Ifyo caba ubusokololo ubwawamisha ubwakwa Lesa kuli ifwe, Ena kuti aifimbula Umwine nokwisa ika nokwikala mmubili wabantu, pakusenda ulubembu namalwele ukufuma kumutundu wabantu, nokutulubula ukutubwekesha kuli Taata. Ico cisuma, bushe tacili icisuma? Ifwe mucine tuletasha pali ico.

<sup>5</sup> Nomba, mailo ubushiku, Ndemonu Ningile ukulomba ubwelelo. Ine . . . Billy alinsendele, bwangu, mailo ubushiku, pantu cali kwati ni . . . Nalinaka. Lelo kulya ukulongana, kulya kulingulula, kabili tapali nangu umo ukeshiba ifyo ico caba, kanofye cilifye . . . Imwe mulingile ukwisa muli cena, pakucishiba, mwamona. Takwaba inshila yakwisha ukucilondolwelamo. Takwaba i—inshila iyo mwingacicitilamo. Cena cabafye icakupitamo ici—icishaishibikwa ku muntu, kanofye abo abapita muli cena. Ifyo cicita kumutundu wamuntunse, ifyo cicita kumuntu, cileta umweo wine ukufuma muli ena!

<sup>6</sup> Ukuba, mwikala mufyalo fibili. Iwe waba mwisonde *pano*, kabili waba mwisonde *kulya*, lintu iwe uli pamo nomuntu umbi, limbi imyaka amakumi yasano iyapitapo; kabili kuti waba nomuntu umo, imyaka ukufuma ileelo, iilesa; kabili

nomba wasanga ukuti namwiminina kucintamba kuno, kabili ulenda pacintu icacitike iingi, iingi imyaka iyapitapo; nalimo imilungu iyapitapo, imyeshi iyapitapo; icalo cimbi, incende imbi, nangu icintu cimo. Kabili waesha ukuisunga uwaololoka, muli ico, nokutontonkanya; ndemyeba, cena cintu cimo. Lelo Shikulu alitupala ukufika pano, muli cena, kabili tuli abansansa nganshi, kabili tulesubila nomba ukutila Lesa alakwata ubukata ukufuma mukulongana.

<sup>7</sup> Nomba, mu—mukulongana muno bushiku, Nacitontonkanya ukutila, ilyo tucilifye abantu abanono, capamo; imisonkano isabankanishiwafye muno mwine, kabili yabantufye abamuno. Kabili ilyo tatulaya muciputulwa icikalamba icamisonkano, Nacilatontonkanya, ileelo, ukutila kuti Naesha nalimo ukukwata ukusambilisha kumo ukwanshita yakale, ukufuma muli Baibele, kubantu; ukutila ilyo icintu icikalamba caisa, nga Lesa acituma kuli ifwe, lyena tuli nokwisa cumfwikisha bwino.

<sup>8</sup> Nangu cibefyo, ukundapwa kwamaka yakwa Lesa kwabafye i—icaambi kundobani, icakwikatilako isabi, nga fintu mwaishiba. Nicocinefye...Isabi likata kucambi nokwikata indobani. Eico icikankala cesu...Ukupwishishisha kwesu kumo nyuku, ukutila, imyeo yalinonkelwe kuli Yesu Kristu.

<sup>9</sup> Lesa nga cakuti amiposha muno bushiku, imwe kuti mwalwala nakabili ilyo tamulafwa. Kuti mwalwala nakabili, mu mwaka umo ukufuma pali nomba, nangu imyaka ibili ukufuma pali nomba; kuti mwalwala mu mulungu umo ukufuma pali nomba, nangu ubushiku bumo ukufuma pali nomba. Nshishibe. Lelo kuli icintu cimo ica cishinka icakutila, muli nokusha lino isonde, shimo muli ishi nshiku, pantu ici cabikwapofye ifintu.

<sup>10</sup> Lelo ulyo mweo uukakumana na Mupashi wa Mushilo kabili walifyalwa cipya cipya, walikwata Umweo wa Muyayaya. Te mulandu icilecitika muno, iwe tawakatale onaika. Yesu atile, “Uyo umfwa Ifyebo Fyandi, ukucetekela pali Ena uyo wa Ntumine, nakwata,” iyo ninshita yanomba, “Umweo wa muyayaya, takese mukwebaulwa; lelo nakwata,” akale, “nafuma mumfwa aingila mu Mweo.” Ico kuti catulenga bonse ukuba ba Methodistini nokutampa ukupunda, (bushe teifyo?) ico nacilungama, ukutontonkanya ukuti, ukuti Lesa alicita ico. Nomba, ico te cebo candi; cilya Cakwe, Yohane Washila 5:24.

<sup>11</sup> Yohane Washila 6, Yesu atile, “Uyo uulya umubili Wandi, nokunwa Umulopa Wandi, nakwata Umweo wa muyayaya; kabili Nkamwimya pabushiku bwakulekelesha.” Ico nacilungama. “Uyo ulya umubili Wandi, nokunwa umulopa Wandi, nakwata,” iyo ninshita ilipo, “Umweo wa muyayaya.” Nomba, uku “ukwa pe na pe,” cena tacyafye ukufuma kukupuputulwa kumo ukuya kukubiye, lelo ukuya ukupita mu Muyayaya.

<sup>12</sup> Kabili nomba, imwe bamo bakapyunga mwebekeleko, ukwishiba ukutula ulya uwape nape “Umweo” wafuma kwishiwi limo line ilyo ilipilibula “Umweo wakwa Lesa.” Ishiwi Zoe, ishiwi lya ci Greeki, ilyo ilipilibula “Umweo wakwa Lesa Umwine.”

<sup>13</sup> Nomba, tulesa mukuba umwana mwaume nangu umwana mwanakashi wakwa Lesa, ubufyashi bwakwa Lesa, ne ciputulwa ca Mweo wakwa Lesa muli ifwe. Ifwe tekuti tufwe nakabili ukucila ifyo Lesa engonaika, nga calieseshe ukuba ifyo. Eico, ifwe natukwata Umweo wa muayayaya; kabili tukesabushiwa mubushiku bwakulekelesha. Bushe ico cisuma? Ico kuti calenga ba Baptisti, ba Methodisti, ukuposhanya muminwe nokubilikisha. Bushe tekuti cibe ifyo fine? Mucine kuti caba. Ico nacilungma.

<sup>14</sup> Ico e cintu cawama palwa bukapepa bwanshita yakale. Cena cilengafye umuntu onse ukwikala capamo nokutemwana umo nomubiye. Mucine cilacita ifyo. Cilafumyapo ukupusana konse, cilenga ifibumbwa fipya. Cili nokupanga i—ikoti lyamutengo naofoloshi, baikukutula umo nomubiye nokutula, “Munyina, bushe uli shani?” Ico nacilungama. Icine cine bali nokucita ico. Cena calapanga indeleshi ya kolokondwe, nakaliko, babika amaboko yabo pamubiye nokutula, “Nkashi, Nalikutemwa.” Ifyo efyo cicita. Cena mucine efyo cicita, cilepaulafye ubupusano. “Umukankala nangu umubusu, umusha nangu umuntungwa, ifwe bonse tuli umo muli Kristu Yesu.”

<sup>15</sup> Pa Mulungu, pehema, ico Ndemona kuliko ibumba lyonse ilyabantu bamwihema abekele muno, ifwe twalikwete—ifwe twalikwete i—isambililo lye sukulu lyapa Mulungu ilyaletila, “ubulubulo ukupitila mumulopa.” Kabili Naishilesendwa muli lyena, mpaka Naumfwa kwati Ncili muncende imbi nalyena, palwa *Ubulubulo Ukupitila Mu Mulopa*.

<sup>16</sup> Kabili ileelo munshita yabushiku, pantu ulupwa lwaciya nokwisa bwangu kuno, icakuti bomfweko ukulongana kwanyimbo, nafimbipo, Naciba mumuputule. Kabili cacimoneka kwati...Nacitendeka ukubelenga mu Malembo, kabili Nacisanga icintu cimo. Nacitontonkanya ukutula, “Ukuba, nga cakuti Shikulu asuminisha, Nalalandafye pali ico pakashita akanono muno bushiku.”

<sup>17</sup> Ilyo ilili, *Ubulubulo Ukupitila Mu Mulopa*, pa Mulungu. Nomba, muno bushiku, Nalalanda pa *Ubulubulo Ukupitila Mu Maka*. Kabili mailo ubushiku Nkesa landa pa *Ubulubulo Mu Kupwililika*, (nga Lesa asuminisha, ifyo cili), *Mu Kusangalala*. Mumulopa, mumaka, kabili mukusangalala; ubulubulo!

<sup>18</sup> Kabili nokufumyamo ici...Nomba, abantu abengi, abasuma, bakasambilila abasambilila balishiba ifyakupula nokupela uyu musango wabusokololo, nalimo, pali *ici*, nangu *ico*, nangu ukuposa bamo. Lelo, ine, Ndi nga umo uwa aba muno

abashaishiba ukubelenga bakashimikila abo abali . . . Icintufye cimo ico Naishiba ukucita, kuba uwashininkisha ukutila Ndi mupepi nganshi kukulungamika, nangu cibe fyo, kuya kufinshingwa. Nga Natampile ukwenda ukuya kucibumba, kabili ulubuto kuli *luno* lubali, kuti Nalanda ifyo lwaciba, ifyofye Nacimoneka; nga cakutila Naciba iciswango icamafutu yane, nangu—nangu yasano, nangu ifyo cena cali, nga cakuti Namona umusango wacinshingwa ico Nalangisha.

<sup>19</sup> Nomba, Icipangano Cakale cali icinshingwa ca Cipangano Cipy. Cali lubali lumbi. Ngo mweshi, kukasuba; akasuba ukubalika pa mweshi, kalangisha ulubuuto kwisonde. Kabili Nalitemwafye Icipangano Cakale! Cena caisulamofye imilumbe nga filya, nangu, nge fyo cingaba. Nomba, ukupwililika . . .

<sup>20</sup> Mu Kutendeka, ilyo Lesa apangile a—akasuba, intanshi, umweshi ewakonkelepo, ulya mweshi nakasuba fimininako Kristu kabili na Chalichi. Nga filya akasuba katula mumaka yakako nobukata; kabili ilyo kawa, kasanika ulubuuto lwakako kumweshi, mumfifi, kukupela ulubuuto pesonde ilyo akasuba kaya. Yesu, ilyo Aile, Aile mu Bukata nokusanika Ulubuuto Lwakwe ukuponena pa Chalichi; ukupela, i Chalichi, u Lubuuto lwa Mbila nsuma mpaka Akabwele, oh, owe, kabili nomba bena bakopana. Ico cikawama. Cikaba Ulubuuto lumu ulukalamba ulwamweshi kabili . . . “Umwana wa mpaanga e lubuuto lwauko.” Bena tabakakabile akasuba nakabili, mu Musumba.

<sup>21</sup> Nomba ukulangisha ukunono, lekeni tubwelele mu Kufuma. Kabili Ndesubila tamunakile palwa ine ukulanda mu Kufuma.

<sup>22</sup> Inshita imo, muchalichi candi ukuciluka umumana, Nalishimikile, Ndecetekela, nalimo umwaka nemyeshi mutanda, pali Yobo, cila nshita yabushiku. Bena nga babwela; Nalebulapofye iciputulwa icinono icakwa Yobo, kabili, twaya pantanshi, ifwe twalecipisha muli Baibe.

<sup>23</sup> Amalembo yonse yalisuntinkana capamo. Tamwaba ukupililikana mu Cebo cakwa Lesa. Iyo, mukwai. Consefye, calipwililika! I Buuku fye lyeka ilyasubwa ngefyo, ilyapwililika . . . Yalembelwe kuli bakalemba abengi, kabili iingi imyaka imyanda ukupitapo pali bakalemba; kabili cila umo muli bena, ku Mupashi wa Mushilo ukulanda, mukusuntinkana capamo. Uyu e mulandu wine, pali yonse aya amabuuku balundako, ba Maccabees ne fintu, cena tacisuntinkana na Ici, eico Nshisuminako kuli yena. *Ici e* Cebo cakwa Lesa, kuli ine.

<sup>24</sup> Kabili namayo umo alembele inkalata kabili atile . . . Nalishimikila; Yobo pacishala. Atile, “Munyina Branham, iwe waba, naukokola na Yobo pacishala inshita ntali nganshi, bushe tauletontokanya ico? Ukokwelepo nalimo imilungu mutanda.” Atile, “Mulandu nshi, bushe ukatala mufumya pacishala camito?”

<sup>25</sup> Ukuba, Natile, “Iyo Mupashi wa Mushilo aleka ukufumya Ifyebo mulya, Ndemona Nalalekafye ukucilanda.” Lelo iyo lyonse Ena anengele ukulanda palwa ena pacishala, ukuba, Naikelefy e pamo nacena; kabili imyeo yalepusuka.

<sup>26</sup> Eico, nga kabila wa mbila nsuma, aishile kumusumba. Alishimikile, inshita imo iyabushiku, ashimikile pakulapila. Inshita imbi iyabushiku iyakonkelepo, ashimikile pakulapila. Inshita yabushiku iyakonkelepo, ashimikile pakulapila. Panuma yanshiku shine nangu shisano, akabungwe kabadikoni kalimukumenye nokutila, “Munyina, bushe tekuti ushimikileko pacintu cimbi kunse yakulapila?”

<sup>27</sup> Atile, “Oh, ee. Leken i bonse balapile, intanshi, lyena Ndi nokushimikila pacintu cimbi.” Eico lilya li—lyano ilisuma. Bena, cila umo, lapileni, lyena kuti twashimikila pacintu cimbi. Cisuma.

<sup>28</sup> Ukubwekelako kunuma panono nombu, kuli abo, nangu ukucilapo abo abashali pe Hema pa Mulungu ulucelo. Tulefwaya tubwekele ku chapitala 12. Lelo itontonkanyo lyesu iline line muno bushiku lili mu chapitala 14, ukutendeka na versi ya 13 iya Kufuma. Nombu, twashilile pa versi ya 10, pa Mulungu ulucelo, pa “*ukulubulwa ukupitila mu mulopa.*” Mwebengi imwe mwalishiba ilyashi, Ndi uwashininkisha.

<sup>29</sup> Nombu natwishiba ukutila kuti twapilibula amabula aya ili Buuku, nokupilibula aya amabula. Lelo kwabafye Umo Uyo wingsula i Buuku, ulya ni Yesu Kristu.

<sup>30</sup> Yohane amwene Ibuuku. Lyalikakatikwe. “Kabili alilile pantu takwali umuntu mu Muulu uwinga Lisula, takwali umuntu pesonde, takwali umuntu pesamba lyacalo. Lelo kwaliko Umwana wa mpaanga uyo waipaiwe ilyo umufula wesonde taulabapo, aishile senda Ibuuku ukufuma kukuboko kwakulyo ukwa Uyo uwaikele pa Cipuna cabufumu, nokwisula ifikakatikilo no—nokwisula i—i Buuku, nokukakula ifikakatikilo ifyo. Kabili Aali uwalinga, pantu Alipaiwe ilyo umufula wesonde taulabako.”

<sup>31</sup> Leken i tulande kuli Ena, muno bushiku, kabili uku Mulomba ukuti atwiswileko Lyena ino ine nshita.

<sup>32</sup> Nombu, mwebacikuku, Taata wakutemwa, twaisa kuli Imwe, twalanda kuli Imwe, mukubalilapo, mwi Shina lyakwa Yesu. Tulepepa nombu, ukutila, ilyo twiminina pano, nokufimbwa pesamba lya uyu mutenge, muno bushiku, uko ilya mfula yacipupu ilepuma kunse, ukuloka ukulaifola nokulapupa, tuletasha nganshi ukukwata ing’anda yakwa Lesa iyakwisamo. Kabili tuletasha ukutila kwalibako icamba, umwakubutukila; Mwatile, “I Shina lyakwa Shikulu cambia icamaka nganshi; abalungami babutukila muli cena kabili balicingililwa.” Tuli abansansa nganshi ukutila twalishiba Ishina lyakwa Shikulu, kabili twaisa muli Lyena.

<sup>33</sup> Nomba twapepa ukutila Mwalaisula ici Cebo kuli ifwe, muno bushiku, Taata. Lekeni Mupashi wa Mushilo ese nokwingila mu Cebo. Sembululeni imilomo ya uyu mulanda umubomfi uwapetama, kabili ne mitima ya abo abali nokumfwa, abana Benu. Kabili lekeni Mupashi wa Mushilo asendefye Ifyebo fyakwa Lesa noku Cibika mumutima onse, ukofye Cena cilekabilwa. Tupaleni nomba. Lengeni cipya cipya amano yesu, muno bushiku, mu Mupashi Wenu. Sendeni ubukata ukufuma mukulongana. Pususheni abaluba. Undapeni abalwele. Leteni ku Ng'anda uwabwelelenuma, Shikulu. Kabili twala Mipela amalumbo, pantu twaipusha mwi Shina Lyenu, ilya Mwana Wenu uwatemwikwa, Yesu. Ameni.

<sup>34</sup> Nomba pilibuleni pa versi ya 10 iya chapitala 12 iya Kufuma. Tulebelenga, *“ubulubulo ukupitila mumulopa,”* ifyo kutila Lesa apele icipope cakuti umwana wa mpaanga aali nokwipaiwa muli cila ng'anda, ukutila takwali nangu cimo icakushako.

<sup>35</sup> Ubupingushi bwalepona, kabili nomba ubupingushi bwakushalikisha bwalepekanya ukupona. Lesa aali nokufikilisha i Cebo Cakwe, mpaka nelembo lyakulekelesha. Kabili bonse bulya ubupingushi kunuma kulya bwali icishibilo icapwililika, nangu icipasho icapwililika, icabupingushi ubo buli mupepi nokupona nomba.

<sup>36</sup> Kabili nga kuti mwamona, ilyo ubupingushi tabulapona, nomba bakapyunga kuti bakana ukusuminako kuli ine pali ici, ico icili icalungama, lelo ilyo ubupingushi tabulatendeka ukuma Egipto, Lesa atumine Israele ukuya ku Gosheni. Bena bali mu Gosheni, kabili tapali icikuko icaponene pali bena. Icipasho icapwililika ica Chalichi ukusendwa kulya, ilyo kuli ukupakaswa, mwamona. Cisuma.

<sup>37</sup> Nomba icinkunka icakulekelesha icapumine isonde kulya, nangu ukupuma Egipto, cali nimfwa. Imwe bonse bakabelenga ba Baibele muno, mwalishiba amasambililo yenu ayakwisukulu lyapa Mulungu kabili nafimbipo, balisambililapo ici, nalimo, inshita ishing'i. Lelo, imfwa yali mulwani wakulekelesha ulya uwapumine Egipto.

<sup>38</sup> Kabili umulwani wakulekelesha uyo uuli nokupuma ichalichi nomba nimfwa, ukulandila muli bumupashi. Abo abashakakonke Kristu, mu—mu lubatisho lwa Mupashi wa Mushilo, bakoma kumupashi nokufwa; amachalichi, kuti mwacimona nomba. Panuma ya kwingi, ukupuputulwa ukukalamba nabakabila wambila nsuma balipita mucalo, kabili, lelo, ichalichi efyo cili, emukutila, ukulanda ukulola kufikansa fyacalo ifyamuchalichi, cena cilebipilako cila nshita. Ba membala baciko bekalafye umusango onse balefwailamo, ukucita icintu icili conse ico balefwaya ukucita, cibe, baleita abene abena Kristu, kabili batila balifye bwino.

<sup>39</sup> Ukuba *umwina Kristu*, cipilibula “ukuba nga Kristu.” Tekuti uye kuncende uko tekuti ufwaye ukuba nga cakuti Kristu aishile. Tekuti ulande icintu icili conse ilyo Kristu aisa. Ukukanacita icintu nangu cimo ico tekuti ufwaye ukucita ilyo Kristu aisa. Ukukana tontonkanya nangu cimo ico tekuti ufwaye ukulatontonkanya ilyo Kristu aisa. Kwatafye ipange limo, umutima obe ushintililefye pa Kalbale. Ameni. “Enda mu Lubuuto, ngefyo Ena aba mu Lubuuto, kabili twalikwata isenge umo nomubiye, kabili u Mulopa wakwa Yesu Kristu, u Mwana wakwa Lesa, ulatusangulula ukufuma kukukanalungama konse.” Abo niba Methodist, ba Baptist, kabili ifwe bonse, capamo, citulenga bonse ukuba umo muli Ena.

<sup>40</sup> Nomba, icakulekelesha, icintu cakulekelesha cali nimfwa. Kabili ilyo ilye mfwa tailaisa, kwaliko icikonsolwelo icapangilwe kuli ilye mfwa, kuli bonse abalekabila ukuifulumuka.

<sup>41</sup> Kabili kwaliko icikonsolwelo icapangilwe ilyo takulaba ukonaulwa kwantanshi, ukwesonde ilyalyeshi. Lesa alikwete kashimikila uwabulungami, Noa, kabili ena ashimikile imyaka umwanda umo namakumi yabili, kubantu ukwisa mucibwato. Kabili bonse abakene ukuya palwabo, takwali icashele kano ubupingushi.

<sup>42</sup> Kabili, ileelo, umuntu uyo uukana ukwenda mu Lubuuto lwakwa Kristu, walikana uluse, eico takwaba nangu cimo icashalako kano ubupingushi. Epelafye. Kwabafye ulubali lwakukulyo nakukuso, lumofye ulo wingayako. Kabili niwe wingapanga ukusala kobe.

<sup>43</sup> Nomba, twamona, ilyo i—inshita iikalamba iyabushiku iyabipisha tailafika, iyo Israele aebelwe. Kabili ifwe natulandapo kale pali ico, pakwipaya umwana wa mpaanga.

<sup>44</sup> Lesa aleleta ichalichi Cakwe mukufuma, kukufumya mu Egypto, mumpanga yabulayo. Nalitemwa ico. Bena baleya kulya, mukukwata icalo. Lesa alibapele icalo, lelo libe calicingililwe nefikulu, ifikalamba ifikulwa namapango. Kabili ifibumba ukushinguluka Yeriko, amaceleta kuti yabutuka mukucimfyanya ukushinguluka cena. Kabili tontonkanyenifye pali ico, nomba, Lesa atile, “Ninkupela. Cena cobe.” Lelo bena bali nokuciwamya, ukuciwamya.

<sup>45</sup> Kabili ifyo efyo Lesa acita ileelo. Ena alipela cila umo muli imwe, uyo uule Lufwaya, ulubatisho lwa Mupashi wa Mushilo. Lelo ufwile waingilamo mukati, noku Lwikata, epelafye; nokulwisha ukufumyapo ifyakupusana pusana, nokuponya ifibumba, nokutendeka mulya noku Cikwata.

<sup>46</sup> Watila, “Bakakumba batile, ‘Cena tecesu ileelo.’” Endafye upite pali ico. “Bamayo batile, ‘Nkakutamfya pang’anda.’” Endafye ucipitilile ico. “Umulume atile, ‘Nkakusha.’” Kabiye fye ucipitilile ico. Epelafye. Ufwile waya noku Cikwata! Epelafye.

47 Ukundapwa kwamaka yakwa Lesa kwa cila umo muli imwe. Cila umo muli imwe uwikele muno muno bushiku, nepwalonda, ubwafya bwamutima, fyonse fintu cili, Lesa alipela ubulayo. Kabili bobo, lelo ulingile ukuya nokubukwata.

48 Nomba watila, “Ukuba, Nshileumfwafye bwino.” Ico tacikwetepo nangu cimo icakucita nacena. Ubulayo bobo. Lesa alibupele kuli iwe. Kabiye fye mukati nokwipaya abena Pelishiti, ukufuma kulubali lumo ukuya kulubali lumbi. Kabili fumyamo abena Hifite na—nabena Amore, bepayefye ukubafumyamo. Kabiye mukati, kacisende. Lesa atile, “Cena cenu. Kabiye ucibule.”

49 Lelo Tatile, “Nomba, Nalaingila, mfumyemo fyonse muli cena, nokumikulila imisumba iisuma, nokumikalika mumusebo uwaanguka.” Tacicita muli iyo nshila.

50 Napela iwe ico, kabili naukwata icintu cimo icakucita. Ena musuma apakalamba pakupela impanga, atile Ali nokukwafwilisha kabili nokuba pamo naiwe. Kabiye, cisende!

51 Kabili nga cakutila naulwala, muno nshita yabushiku, walilemana, ulimpofu, nkoma matwi, cibulu, conse ico uli; kabiye, cisende. Lesa atile cobe. Cena cikwatwa cobe. Lesa ewacipele kuli iwe.

52 Abebele ukutila Ali no kubapela cilya icalo. Atumine Malaika ku ntanshi yabo, ukusunga mu nshila, ukubaleta ku ncende uko ico caba.

53 Lolesheni pali balya inengu lintu baile kulya. Pano paishile abali ikumi, batile, “Oh, ifwe tekuti tucite ico. Cena tacingacitwa. Mulandu nshi, ifwe tuli bantu bafyasayansi, kabili natulolesha muli ici cintu ukucipwisha. Cena ukukonka nabu sayansi tekuti cicitwe. Tekuti tucicite.”

54 Lelo kwali abantu babili, umo inshina lyakwe aleitwa Yoshua, na umo aleitwa Kaleb. Bena tabalelolesha kuco abalubali ba sayansi bali. Balelolesha kuco Lesa alandile. Batile, “Ifwe kuti twacita ico.” Kabili neco nacilungama. Kabili babwelele nefya kushininkisha ukutila cena cali icalo icisuma.

55 Ndi uwansansa pali ico icakushininkisha, (bushe imwe tamuli?) icakutila kuli i Calo icisuma pamuulufye wesu! Kabili tuli pabulendo bwesu, muno nshita yabushiku. Alleluya! Nacilungama.

56 Bali apa, nomba, ilyofye ubulubulo tabulacitwa. Lesa afwaile abana bakwa Israele, ukutila bena bafwile bacingililwa, pakwipaya uyu umwana wa mpaanga. Kabili nokubika umulopa pa filu, pa muulu wa ciibi, kwati *ngefi*, kabili na cila cipilala.

57 Kabili bali nokwingila mukati nokulya uyu umwana wa mpaanga, conse ukwabula ukushako; moneni, umwana wa mpaanga onse, telubalifye ulwa uko. Ulubali lwauko lonse lwali nokuliwa.



58 Abantu bamo batila, “Nalalyakofye *ici* icipandwa, kabili Nala—Nalacetekela *ici* icipandwa.” Lelo iwe ufwiye walya Cena conse, conse icinono pamo ica Ciko. Kuti watila, “Oh, Nacetekela Alashilwe pamembu shesu, lelo, ‘mufipumo Fyakwe,’ Nshishibe palwa Ico.” Tulecifwaya Cena conse. Conse icinono pali Cena cifwiye caliwa; conse pali Ico. Fimo Fyena filakosa, lelo tufwiye twalya Ifyo, nangu cibe ifyo. Lesa eflyo alandile.

59 Moneni versi 10 nomba.

*Kabili mwikaleka—mwikaleka nangu cimo ukubapo ukufika na... kulucelo; kabili ico icikashalapo... ukufika mu lucelo... cicocewe no mulilo.*

60 Kabili, nomba, tapali nangu cimo icifwiye ukushalapo; ifintu fyonse. Nomba, Atile, “Lintu mwalya ico, mwikacilya icibishi, nangu ukucibika mu menshi, lelo mufwiye mwalya ico icaipikwa bwino.” Kabili Nintemwa ico.

61 Abantu balesha ukulya i Cebo cakwa Lesa, kabili bena bacisenda Cena kwati ni Cilya icibishi; ukusheta muli Cena, kabili ukufwishila pali Cena, kabili ne fintu fyonse fimbi. Ukutila, “Oh, Ine tekuti ndye Cena. Ine kuti nafilwa ukushipikisha kuli Ico.” Cena tacili icaipikwa ukufikapo. Eflyo cili.

62 Atile, “Mucipike no mulilo.” Umulilo cileimininako Mupashi wa Mushilo. Imwe mufwiye mwabika Lesa mu mutima wenu, mukubalilapo, kabili Cili no Kwipikilwa imwe. Ico nacilungama. Ukucipika Cena bwino, ukucicita, ica munshita, nomba Cili nokumfwika bwino.

63 Nomba, tekuti wiminine ukufumako kwati *ngefi*, kunse, ukutila, “Oh, Ine, Nshishibe nga cakutila Candi, nangula iyo. Ico limbi kuti caba mu nshiku ishapita.” Kwatafyey Mupashi wa Mushilo, mukubalilapo, kabili umone ubundapishi bwa maka yakwa Lesa bulepilibula kuli iwe nomba.

64 Lolesha pali bukapapa ubwakumfwa pa mutima bulepilibula pali iwe nomba, lintu iwe wakwata Mupashi wa Mushilo pano ukwipika umwana wa Mpaanga ilyo Cileisa. Amen. Ico nacilungama. Wipike umwana wa Mpaanga mukubalilapo. Kabili ufwiye wakwata u Mulilo pakwipika Ico pamo. Cifwiye caocewa. Oh, owe, ico e lintu Ciba icisuma. Ukoca Cena, cena cocafye fyonse . . .

65 Naiminine pano, tapapitile inshita iitali, ukupitila mucakocelamo icikalamba, kabili Namwene ifyo ulya umulilo wali uwakaba, kabili cena caleipikafye kabili ukwipika no kwipika. Kabili ilyo cakabishe, i—ifiko mufyela, muli golide, fyonse fyaishile pa muulu, bafitapwilepo. Kabili balelundako wakabishako nakabili mu cakusungulwilamo. Kabili nomba lintu ico caleipikwa ukucilapo, bena balekwata ifintu ifyalekana lekana, ilibwe lya golide ne fintu, ukufuma muli lyena.

<sup>66</sup> Ifyakubalapo ukufuma fyali fiko, ifyaba nge fiko na matipa. Icakonkelepo ukufuma cali kwati libwe, oh, icintu cimo icishali bwino; silufele yamenshi, nefi fintu fyonse, fyafumine, kabili nokutapulapo ukufifumyapo. Catwalililepo, ukufikafye na pesamba, kabili icintu cakulekelesha ico bafumisheko kuli ico cali ni pyrite yamutuntula. Uyo ali ni golide uwapalako.

<sup>67</sup> Namwishiba kwaliba ifintu ifingi mu bantu balesha ukuicenjelela umo no munankwe lintu iwe waba umwina Kristu, nangu ukupashanya bwena, mu musango uuli onse. Mwamona? Lelo iwe kulekafye Mupashi wa Mushilo aipika ifintu fyonse ukufifumya, afumyamo—afumyamo fyonse ifya golide yakupashanya muli iwe, pamo.

<sup>68</sup> Golide yakupashanya, abantu abengi balaya ku Mboshi nokusanga, kabili batontonkanya, oh, bena basangile umukoti wa golide. Yena ilabengeshima ukucilapo pafyo golide icita. Lelo yena ni golide yakupashanya, tamwaba ne cisuma muli yena.

<sup>69</sup> Kabili nomba balepika ico, kabili balatapulapo baposa, kabili batwalililapofye ukwipika yena kabili ukwipika yena, mpaka yaba ni golide yapwililika, ukuipika yafika mukupwa lelo ni golide iyakwa andeleti pesenti.

<sup>70</sup> Kabili ifyo eflyo Lesa acita mu Chalichi Cakwe, apongolwelapo Mupashi wa Mushilo pali Cena, kabili ukwipika mulya mpaka Aposa ukufumyamo bulisonde bonse, kabili nefya kupusana pusana, kabili nefya kuitemwa, kabili nafyonse ifi, mpaka Aipikafye fyonse ukufumya muli cila umo uyo uwingesa kuli Ena. Amen.

<sup>71</sup> Nomba, nomba, kuti mwacumfwa ico. Apa epali itontonkanyo nalimbi limo ilisuma, pa—pa versi 11.

*Kabili eico imwe mukalye uena; pamo ne yenu . . . (kutikeni kuli ici) . . . imisana iyakakwa, . . . (Nalitemwa ico) . . . insapato ku makasa yenu, . . . ne nkonto mu maboko yenu; kabili mukalye cena mukwangufyanya; cena ca kucilila cakwa SHIKULU.*

<sup>72</sup> Nalitemwa ico. Ilyo mulelya, mube abaipekanya ukuya. Uyo emulandu.

<sup>73</sup> Natupilibule ku Bena Efese, chapitala 6 iya Bena Efese, kabili lolesheni apa ico Paulo alandile pakulenga i Chalichi ukuba icaipekanya; chapitala 6 uwa Bena Efese, ukutampila pa versi 14 uwa Bena Efese chapitala 6.

*Eico iminineni, abaikaka mu misana yenu ne cine, . . . ukukwata icakucinga icifuba icabulungami;*

*. . . amakasa yenu ayaba ne cakupekanya ica mbila nsuma ya mutende;*

*Kabili pa muulu wa fintu fyonse, mubule icisolelo ca cicetekelo, kuli ico muli nokuba abashimya . . . imifwi ya bukali iya mubifi.*

*Kabili nokufwala icimpopo cepusukilo nolupanga lwa  
Mupashi, ico icili cebo cakwa Lesa:*

74 Mwamona Paulo alelanda ku muntu uwakuya ku ncende ya bulwi, pakwenda.

75 Lesa, mukutendeka, pakulubula Israele, Atile, “Nomba mufwile ukuipekanya pakwenda. Lintu mwaisa pesamba lya mulopa, kufwala insapato. Nokukaka mumisana yenu. Ukubika inkonto yobe mukuboko kobe kabili nokuba uwaipekanya pa bwite.” Nalitemwa ico.

76 Umuntu nomba, lintu aisa muli Kristu, alafwala insapato sha Mbila nsuma, pakushimikila i Mbila nsuma; nokufwala icimpopo ce pusukilo; ne cakucinga icifuba icabulungami; nokukaka mu misana. Apo pali . . .

77 Ilingi line, mubabulwi bakale, ilyo bafwala ifyo ifyakulwilamo ifya bulwi, balekwata umushipi uukalamba. Baleukaka capamo, ukwikatilila bwino imisana yabo, ifi ifya fisolelo, fyakutandula amafumo ya mulwani. Wesambililo we ilituntulu ilyo ilili kuli ifwe. Kabili lintu umu—umusana watampa ukunaka, kuponya amaboko panshi, necisolelo, bena kuti nomba bakakisha imishipi yabo, baimya pamuulu baikakisha nakabili.

78 Wecikope we icapwililika, ileelo, lintu watampa ukumfwa kwati ulebwelela kunuma, nangu ciwa atila, “Ico tacikwete incito.” Fika nokukakisha umushipi obe panono; tinta ulupanga ukuba ulwaikata panono mukuboko, nokuya kuntanshi. Nalitemwa ico, ube uwaipekanya mukwenda.

79 Umuntu onse uwaleenda pe samba lya mulopa, bulya ubushiku, bamwebele ukwikala palya, tekufuma ukuya mpaka ifipope fyapelwa, ifya kwenda.

80 Kabili umuntu onse uwafyalwa ku Mupashi wakwa Lesa, esa muli Kristu, alikwata u Mweo wa muyayaya; alafwala inkwela yakwe, icakucinga icifuba cakwe, ukwiminina uwaipekanya, kabili alaleshiwa ukuya mpaka ifipope fya myendele fyapelwa.

81 Oh, bushe ico tecakusungusha? Bushe tauli uwansansa ukuya onse uwabikwa pamo, buno ubushiku, imwe mwebabulwi?

82 Twalekwata kembisha wa nyimbo pehema, umutwe walwimbo wali:

Ubulwi epo buli, O mwe bena Kristu ababulwi,  
Icinsu ne cinsu mukukonkana nama nambala,  
Nefya pacifuba filebeka, namalangi yalefuma,  
Icalungama ne cilubo fibikwa pamo ileelo;  
Ubulwi buletwalilila lelo wiba uwanaka,  
Koseni kabili mubulamba Bwakwe  
mwikatishe;

Nga Lesa ali naifwe, icisalu Cakwe  
 icalembwapo cili pali ifwe,  
 Tuli nokwimba ulwimbo lwakwa kacimfya  
 pakulekelesha.

<sup>83</sup> Abengi abashila bakale baliya kunshishi. Lelo bumo muli ishi nshiku, kwishilya mucalo cipya, ilyo bali nokwisa moneka ukuya mu Calo cabulayo, icisalu icalembwa ica capindama cikaba pali ifwe, kabili tukemba ulwimbo lwakwa kacimfya. Lintu tukekala pa Cakulya ca Bwinga ica cungulo bushiku, ukushinguluka itebulo, lilya itebulo likalamba, limbi ilyaba ba mailoshi imyanda amakana mubutali, pamo na bashila abasambwa mu Mulopa nabekala ukushinguluka palya. Ndefwaya ukuya ukukonka mwritebulo nokuposhanya amaboko na onse umu pali bena, ameni, ndebilikishafye. Mulefwaya ukumfwa ine ndebilikisha? Loleleni mpaka Nkafike kulya; mukamone ine. Nshili uwakula umukalamba, cibe, ukulola pali ici.

Lelo, moneni, mu bulendo nombamba. Mube abaipekanya. Tuleya.

<sup>84</sup> Apa pali icikope cabulanda, ilyo tatulati tufike kulya kwi sambililo lyesu ilya cila bushiku, cilesangwa mu versi 38 palya. Kutikeni.

*Kabili abacintobe ntobe baile pa muulu ne mikuni  
 yabo...*

<sup>85</sup> Palya epo Israele apangile icilubo. Icintu icamaka yakalamba calicitilwe. Na bantu abashapilibulwa bakonkele pa mulandu wa maka ayakalamba, mukulekelesha cabaposele mu bwafya. Kabili ukuyako na pesamba, twalamona pano, mu versi 42 na versi 43. Shikulu alandile kuli Mose, atile, ukutila, “Takuli umu lelo nyabo abapelwe bulilambo... ebengalya kwi lambo,” ukucila, “lelo nibalya abasembulwilwe. Tebeni, tebakunse, tapali nangu umu uufwile alyako kano balya abasembulwilwe.”

<sup>86</sup> Kabili we cansoni we ico tukwete ileelo, muli buno bushiku, bacibusa batemwikwa; ukutila lintu, mu chalichi, umuntu unse uyo uwaba mu chalichi alalya umulalilo. Kabili ico cintu calubana. Kanofye abo abalubulwa, ebamo ababa abafikapo.

<sup>87</sup> Esaya alandile nokutila, “Amatebulo yakwa Shikulu yali nokwisulapo amalushi.” Atile, “Ninani Ndi nokusambilisha Isambililo? Nibalya abasumunwa ku mabele.” Atile, “Icilembo cifwile caba pacilembo cibiye; umushilwa pa mushilwa ubiye; apa akanono napalya akanono.” “Kabili mwikatilile kuli ico icaba icisuma.” Lesa alelanda, naishiba ukutila ubushiku ubo tuleikalilamo, ukutila ichalichi cili nokuba ica fikansa fya calo nganshi, mpaka bakaleka ifintu fyonse, abantu, ukwisamo; apofye bena amashina yabo yalilembwa mwi buuku lya chalichi, bali niba membala, balelya no mulalilo.

<sup>88</sup> Kabili Baibele itila, “Uyo uwalyako kabili nokunwako, uushalinga, ali uwamulandu ku mubili no Mulopa wakwa Shikulu.”

Yohane Washila, chapitala 13, Yesu alilandile.

<sup>89</sup> Abena Korinto Wacibili chapitala 11, Paulo atile, imyaka ya kuntanshi, ukutila, “Uyo uwalya nokunwa ici, uushalinga, ali nokuba uwa mulandu ku mubili na ku Mulopa wakwa Shikulu. Leken i umuntu aipime umwine pa lwakwe,” atile, “ilyo talalya.” Ndeambula Amalembu. Ico nacilungama. “Uyo uwalya nokunwa, uushaba uwalinga, ailila nokunwa ukusekwa palwakwe umwine eka, pakukana lingulula umubili wakwa Shikulu. Kabili pali uyu umulandu abengi baba abalwalilila kabili abanaka pakati kenu, kabili abengi balala utwamfwa.” Ube uwashininkisha ukutila iwe nawiminina uwalungama pamo na Lesa.

<sup>90</sup> Ici cili pano mucinshingwa, icakutila, takuli nangu umo lelo kano abasembululwa! Temulandu nefyo engaba uwanakila, nomusango untu aafwilishemo ichalichi caba Yuda; afwile aba umuntu umo uwapilibulwa ukufuma kuli bu kapepa, afwile aba uwacetekela uwasembululwa icine cine, ilyo talalya umulalilo, nangu ukulya icakucilila. Oh, ifyo twaba ukutali noyo umushilwa ileelo!

<sup>91</sup> Nomba natwangufyanye, nombu. Kabili Lesa abaletele ukubafumya muno nshita yabushiku. Twalaisula paversi 13 muchapitala 14.

<sup>92</sup> Lesa abapele i Ntumba ya Mulilo iya kubatangilila. Ndetontokanya bacikwata icikope apa, muno nshita yabushiku. Kabili Ndelanda ico nomucinshi. Kwi tontokanyo lyandi ilya cishinka, ilyo tuli pano muli ili ibumba mu nshita ino iya bushiku, Nincetekela ukutila Ico cili pamo naifwe muno nshita ya bushiku. I Ntumba imoine iya Mulilo ilya iya tungulwile abana ba Israele, eili kuntanshi yesu, ukucita ifishibilo fimo fine ne fipeshu mano. Kabili kafundisha uuli onse pano, nangu kasambilila wa Baibele, naishiba ukutila Malaika ulya uwakonkele Israele kabili nokubatungulula ku calo ca bulayo, ali ni Malaika wa Cipangano, uyo uwali ni Yesu Kristu.

<sup>93</sup> Kabili, ileelo, “Yesu Kristu uyo uwaba cimo cine mailo, ileelo, no muyayaya” ali kuntanshi ya ili ibumba abo imwe mwita bakakunkuluka wa mushilo, nga mulefwaya ukucita ico. Nacilungama. Ukutwalililapo, ukutungulula ukufuma ku kucimfya ukuya ku kucimfya! Lesa Alumbaniwe!

<sup>94</sup> Muli ifyo ifyalo, muli shilya inshiku, bali abasushiwa kabili abapatwa nokukanwa, nokukanwa ku fyalo, nokwitwa ifili fyonse.

<sup>95</sup> Eico efyo cili ileelo, kuwacetekela uwacine. Iwe, muma chalichi yenu, mwalishiba, lintu iwe wabula ubwiminishi ubwa

pali Kristu nokulanda Icine, ichalichi conse citila, “Lolesheni pali ena! Nafulungana. Ali uwapena.” Mwamona?

<sup>96</sup> Taufwile ukukutika pali ico. Twalililapo ukukonka. Imwe bonse namufwala icakucinga icifuba nomba. Kabili u Mulopa naumitangilila; Mupashi wa Mushilo aletungulula imwe. Twalililenipofye ukwenda. Mwikutika kucintu conse ico umuntu alemyeba. Loleshenifye ukulungatana na Kalbale, nokutwalililapo ukwenda. Icakupashanya icisuma!

<sup>97</sup> Nomba, balifumine, ukupita, kabili bakwete...Kabili nomba moneni, ubulubulo bwa mulopa ebwabafumishe mu Egypto, nomba bali nokukwata icintu cimo cimbi icakubatwala mulya mucalo. Nomba batampilefye ukwenda. Bafumine, mukusembululwa, kabili baishile pesamba lya mulopa, kabili namukwenda. Nomba baishilefika pacintu cimo. Baleya kulya, ukwishiba ukutila balipulile mumfwa baingila mu mweo; balishibe ukutila balikwete u Mweo wa Muyayaya.

<sup>98</sup> Lelo bali pano, baleisa, nobwafya bwatampa ukwisa. Kwaishile aba mumulalo wabulwi ubwakwa Farao, balebakonka, ukuya basenda. Nobwafya bwaishilemo.

<sup>99</sup> Kutikeni! “Lesu ecakushinamo cesu kabili amaka yesu, kafwa uubapo mu nshita ya bwafya.” Oh, Ndesubila mwacimona ici. Mwamona? Cili apa. Ishibeni . . .Lelo, kutikeni, muli versi 13 nomba.

*Kabili Mose alandile ku bantu ukutila, Mwitina, . . .*

<sup>100</sup> Nalitemwa ico. Panuma Yesu abukile ukufuma ku bafwa, Ifyebo Fyakwe mukutwalilila fyali, “Mwitina.”

<sup>101</sup> Ico ecaba ubwafya ne Chalichi ileelo, caba icatina ukulola kumfwa imwe muli nokufilwa. Kuti mwafilwa shani ilyo imwe muli muli Kristu? Imwe tekuti mufilwe. Imwe mwalikwata u Mweo wa muyayaya. Ingulu shonse kumbo tekuti shimisunkanye. Mwalikwata u Mweo wa muyayaya. Yesu efyo alandile. Eico mwilatina ukufilwa.

<sup>102</sup> Mwatila, “Ukuba, Ndetina kuti Naba uwafulungana.” Kuti nafwaya ukukwata ukufulungana ukunono ukucila ukwikala fondolo nokukana cita icili conse. Mfwile icine cine nacita. Umuntu uyo uuli nokucita icintu cimo. . .

<sup>103</sup> Calilandwa palwa kwa Ballard pano, umuntu uwaishile fwaya icinto kuli ena, kabili atile, “Lemba ishina lyobe apa.” Abulile pensulo yakwe, nokulemba. Atile, “Nikwisa ukuli icakufutilako cobe?”

Atile, “Nshipanga ifi . . .nshipanga ifilubo.”

Atile, “Ine tekuti nkubomfye; iwe tekuti ucite nangu cimo.”

<sup>104</sup> Ico nacilungama. Iwe taupanga ifilubo, iwe tekuti—iwe tekuti ucite nangu cimo. Natutwalililepo, munyina. Ba uwakalabana kabili natuleya. Nalitemwa Longfellow kulya:

Mwinjeba, mu mpendwa yakullosha,  
Umweo waba lelo ciloto cabulapo!  
Kabili umweo walifwa uyo uupona,  
Kabili ifintu tafyaba ifyo fimoneka.

Atile:

Ee, umweo utuntulu! Kabili umweo  
wacishinka!

Kabili inshishi tebuyo wauko;  
Iwe uli lukungu, ku lukungu eko ubwelela,  
Tawalandilwe pa mweo.

Lekeni tube abakalabana nokucita,  
No mutima uwakulwisha icili conse;  
Mwiba pamo nga bacibulu, nge ng'ombe  
ishitungululwa!  
Muleba intukushi!

<sup>105</sup> Taufwile walolela pa bantu ukukweba aukuya kuli Kristu. Ufwile ukwiminina ngo mwaume nangu namayo, ku Mupokelelafye, nokwenda ukuya ku ntanshi mukucimfya. Amen. Ifyo eflyo Lesa afwaya, ababipa, ababulwi abaipekanya. Iwe tekuti limbi ube, uwafina amapaundi umwanda umo na yasano, lelo kuti waba uwabukali, munyina, kabili uwaisulamo amaka, nga cakutilla iwe kuti walekafye Lesa akwata inshila Yakwe. Nalimonapo umuntu uwafinine amapaundi imyanda ibili, tamwali necinono ica kumulangisha umwaume. Ico nacilungama. Ico nacilungama. Moneni.

*. . . Mose alandile ku bantu, Mwitina . . . iyo, iminineni shilili, kabili mumone ipusukilo lyakwa SHIKULU, . . .*

<sup>106</sup> Ico cisuma. Twalililenipofye ukwenda. Mwitina pa cintu nangu cimo. Nga cakutilla iwe walipokelela Kristu ngo Mupusushi obe, twalililapo.

<sup>107</sup> "Munyina Branham, Ndefwaya ulubatisho lwa Mupashi wa Mushilo." Twalililapofye ukuya. Witina.

<sup>108</sup> Iwe watila, "Nindwala nomba, Munyina Branham. Ine tekuti njeko kuntanshi ukucila pano." Winaka. Twalililapofye ukwenda; umone ipusukilo lyakwa Shikulu! Ulipokelele. Twalililapofye ukwenda.

<sup>109</sup> "Cili nokuba shani? Dokota alinkana." Nomba, umuntu alicitile icawamisha ico engacita, lelo Lesa talati acite icawamisha Cakwe nomba. Ico nacilungama.

<sup>110</sup> Pakashitafye akanono, kutika kuli ena nomba. Nacilungama.

*. . . SHIKULU, untu alalangisha kuli iwe ileelo: pantu abena Egypto (bakesha bafyela, icine- . . . bakacita wa fibi) . . .*

111 Atile, “Munyina Branham, nga cakutula kuti Naleka ukupeepa fwaka! Nga cakutula kuti Naikalafye ndenwa! Nga cakutula kuti Naleka ukwiba! Nga cakutula kuti Naleka ukucita ifyo ncita *ifi, filya*, kabili na *fimbi*.” Taufwile ukuba uwanaka. Twalililapofye ukwenda. Lesa euli nokusakamana pali fyonse ifyashala.

112 “Nga cakutula Nalishibe ukutula Ine kuti nacita ico, Munyina Branham, kuti Napokelela Kristu nombaline.” Taufwile iwe ukusakamana. Twalililapofye. Kabiye iwe kuntanshi. Uli nokumona ipusukilo lyakwa Shikulu!

*...pantu abena Egypto aba wamona ileelo, tawakabamone nakabili ku nshita.* (Ameni. Cena cili nokupwa, panuma yakashita akanono.)

*SHIKULU Akamilwila, kabili imwe mukaba... ikale tondolo.*

*Kabili SHIKULU alandile kuli Mose, Cinshi ico ulelilila kuli ine? landa ku bana ba Israele ukuti baye ku ntanshi:* (Nalitemwa ico.)

113 Taufwile ukweshia ukutula, ukutula, “Ukuba, Naishile yampanya ku chalichi, imyaka ikumi iyapitapo Munyina Branham. Naliba membala umusuma uwa cishinka.” Ico cisuma; Ndetotela pali ico. Lelo lekeni tuyeko kuntanshi, muno nshita ya bushiku. Lesa aleya kuntanshi. Abantu ileelo, pano, balebwelelamo kunuma, batila, “Ukuba, nomba . . .”

114 Sayansi, imyaka umwanda umo na makumi yasano iya pitapo; kwali sayansi mu France, uwatile, “Nga cakutula umuntu aendele pakubutukisha kwaba mailoshi amakumi yatatu pali ora imo, cilya icitinta kuti camufumya ena pe sonde, kabili kuti aya.” Huh! Ba mailoshi amakumi yatatu pali ora? Ena aleya pali ba mailoshi umwanda umo na mutanda pali ora nomba. Tamwakatale amumfwa sayansi yasontelela kuli ulya umuntu. Ena alifye bwino mu bushiku bwakwe, lelo bena baleikalila mu bushiku bumbi. Ico nacilungama.

115 Lelo, ifwe bakashimikila, oh, iyo. “Ubundapishi bwa maka yakwa Lesa? Nomba lekeni mone ico—ico Uwashila Moody, Finney, Knox, Calvin, bamo ico balandile palwa Ico.” Bena balilungike munshiku shabo. Lelo tuleya, tuleya kuntanshi. Natukwata icintu cimo cimbi.

116 Yesu atile, mumulumbe kulya, uwakwakatanda, lintu katanda aile kuntanshi nokubyala imbuto. Kabili shimo... Umulwani aishile nokubyalamo yamo amankumba mungano. Atile, “Lekenifyonse fikulile pamo.”

117 Imwe lyonse mulesontelela pafyo ububi ubwa mwisonde buleya, lelo mulefilwa ukumona ifyo i Chalichi cileya mumaka, panshita imoine. Cena cileya cileima, ukwiminina mucalo. Oh, Ena mukuni uunono, lelo, munyina, Lesa ali pamo Nacena.



Kabili Ali nokucimfya ukubafye uwashininkisha nga fintu Kristu abukile ukufuma ku bafwa. Amen. Ichalichi cakwa Lesa tacakatele acifilwa. “Impongolo sha kumbo tashakatale ashilwisha Cena.” Balangishe ukutila bena kuti balwisha Cena, lelo tekuti bacimfye. I Chalichi cili nokucimfya, ukupitila mu Mulopa wakwa Yesu Kristu, nokwenda kwaku cimfya. Ndelanda icishinka pali ici icintu cimo, kabili Lesa ali nokukwata i Chalichi icabula itolo, ulukanshi, nangu icibala. Amen. Ndi uwansansa palwa ico.

118 “Nomba, nga cakutila Ndi muli cilya i Chalichi, ameni! Munyina Branham, kuti waingilamo shani muli Cena? Ukupitila mu nkalata?”

Iyo.

“Kuti waingilamo shani muli Cena?”

Kupitila Mukufyalwa, ukufyalwa muli Cena!

119 Naliba mulupwa lwakwa Branham, cili nokuba imyaka amakumi yane naisano, pa sikisi muli uyu Shinde uleisa, kabili tabatalile abanjipusha ukuba mulupwa lwabo. Nafyelwe Branham. Ndi nokuba lyonse Branham.

120 Nafyelwe umwina Kristu, muli Yesu Kristu. Ndi nokuba umwina Kristu pantu Lesa acilashike ifyo, ukupitila mukusalwa. Atwitile, ukupitila mu kusenamina ukwa Mwana Wakwe Wine uwa temwikwa. Twa Mupokelele kabili twakwete u Mweo wa Muyayaya. “Ukupitilafye mukuposhanya kumo?” “Ukupitila muli bumembala bumo?” “Ukupitila muli kalata imo?” “Ukupitila mu Mupashi umo ifwe bonse twalibatishiwa ukwingila mu Mubili umo, Yesu Kristu,” kabili twaba abekashi banensu aba mu Bufumu.

121 Nacilatontonkanya ileelo, ilyo Nacifuma ndepepa, ukutila buno ebushiku tuli nokwasukilapo. Nshili nokwasukila pa nkulo iyo iyantangilile nangu inkulo iikesa panuma yandi, nangu inkulo iikesa panuma yandi. Lelo, mu Bupingushi, Ndi nokwiminina na ino inkulo. Kabili Nacitila, “Lolsheni kulya, icikope ca mwanakashi ecili ica kumwenako, ukunwa ubwalwa, icintu cimo na cimbi, atile ena ‘talepema bwino,’ nangu icintu cimo.” Natile, “Ee, kabili uwabula u Mweo, pamo.” Nacilungama. Mwaumfwa. Natile, “Wecansoni we!”

122 “Nokushimikila konse,” Natile, “inshita shimo shimo cimoneka,” Naebele umukashi wandi, Natile, “inshita shimo shimo cimoneka kwati tacilecita icisuma icili conse. Lelo Mfwile ukuba ishiwi ilyakusoka, munshila yonse, temulandu neco abantu bacita palwa ico. Mfwile nashimikila i Mbila nsuma, nangu cibe ifyo, nokupela ubunte pakubuka kabili na pa Maka yakwa Yesu Kristu.” Leken i bena bakane Ico, kabili bafumeko; Lesa ali nokubapingula pa Bupingushi pali ico. Nabafye uwashingamwa pa kushimikila, naba kapyunga bambi pamo, abo abashimikila i Mbila nsuma.

<sup>123</sup> Nomba, Natemwafye Ico. Moneni, “Kabiyeni ku ntanshi nomba,” kabili muli nokumona ubukata bwakwa Lesa. Lelo, kutikeni, mu versi 16 nomba. Tubelenga ici.

*Lelo sumbuleni. . .pamuulu i nkonto, . . .*

<sup>124</sup> “Inkoto,” iyo iyali ni nkoto ya bupingushi. Nomba, tayali ni nkoto yakwa Mose. Yali ni nkoto yakwa Lesa. Nga kuti mwamona, Mose, abulile inkoto, aimishe mu muulu *ngefi*, impantila shaishile. Aimishe pa menshi, amenshi yasangwike umulopa. Yena yali ni nkoto yakwa Lesa iya bupingushi. Kabili ilya inkonto imoine. . . Cumfweni! Ilya inkonto imoine eyo aumineko mu cilibwe nayo; kabili umulale waishile kulubali lwa cilibwe, na menshi yafumine mu cilibwe.

<sup>125</sup> Nomba, cilya icilibwe cali ni Kristu, kabili ebwali ubupingushi bwakwa Lesa. “Ubushiku mukalyako eico, ubo e bushiku mukafwa.” Ukuma Kristu pa Kalbale, kabili nokulipila cilya icabipa, ica bucushi bwamfwa. Takuli umuntu, uwingalondolola ifyo cali, nangu takwakatale akuba. Palya Lesa abikile ubupingushi bwa maka yakwa Lesa pali Ena, kabili Amumine kulubali, na menshi yafumine kulubali Lwakwe no Mulopa no Mupashi, pa bulubulo bwesu.

<sup>126</sup> Ifyo abantu bapenta icikope Cakwe, inshita shimo, no mwingila Nafwala, nangu icintu cimo nangu icibiye, palya pa capindama. Ico tacaba ifyo. Bamufulile pambilibili ulya u Muntu, na conse icalubana, icabipa ico bacitile; lelo Ena ali nokuba. Efyo Ali, uwali pamuulu kabili uwa bufumu uwa mwi sonde lyonse, ilyo ilyaliko nangu ilikabako. Kabili nomba bamufulile, ubwamba, pacapindama; alashilwe, auminwe, umulopa walesuma; ifisansangu fya mate yakupumya fyakobeme pa cinso Cakwe; icilongwe ca myunga icakupumya cali pa mutwe Wakwe. Lelo palya epo Acimfishe imfwa, imbo, ulubembu, ukulwala, kabili nenshinshi, kabili alipile umutengo pali ifwe bonse.

<sup>127</sup> Limo limo cilandwa ukutila, inshita shimo, “Palya epo Asendele ulubola lwa mfwa.” Palya epo Paulo atile, “O we mfwa, ulubola lobe lulikwisa?”

<sup>128</sup> Balinjeba ukutila utushishi utwingi, inshimu ne fintu, fyalikwata ulubola, kabili fyalikwata sumu, muli fyena. Lelo panshita imo shasuma, shilalufya ulubola lwashiko.

<sup>129</sup> Imfwa yalikwete ulubola muli yena, pa nshita imo; lelo Kristu, pa Kalbale, afumishemo ulubola mumfwa. Alleluya! Oh, lintu Natontokanya pali ico! Palya Atintile ulubola ukulufumya mumfwa, pali iwe na ine, ulubola lonse ulwa mfwa.

<sup>130</sup> Paulo atile, lintu abali nokuputulako umutwe wakwe, mucifungo caku Roma, atile, “Wemfwa, ulubola lobe lulikwi?” Asontele ukubwelela ku Kalbale, kabili palya epo ulubola lwafumishiwe mumfwa. “Wenshinshi, ukucimfya kobe kuli kwisa?” Atile, “Lelo ukutotela kube kuli Lesa, uyo uutupela

ukucimfya ukupitila muli Shikulu Yesu Kristu.” Ameni. Nacilungama.

...i nkoto (ubupingushi), *kabili aitambalike...* yakupilwe pa—pali bamba, *nokwakanya ena: kabili abana bakwa Israele balapita pa mushili uwauma ukupita pakati akabamba.*

*Kabili Ine, moneni, Ndi nokukosha umutima wa bena Egipto, kabili bali nokukonka imwe: kabili Nkapoka umucinshi pali Farao, nabamulalo wakwe onse, kabili na pa maceleta, kabili napali ba kensha waba kabalwe.*

*Kabili abena Egipto bakeshiba ukutila Ndi SHIKULU, kabili Ninkwata umucinshi wandi pali Faralo, kabili napa maceleta yakwe, kabili napali bakensha waba kabalwe wakwe.*

*Kabili malaika wakwa Lesa, . . .*

<sup>131</sup> Kutikeni! Kakeni icakukakilako nombamba. “Kabili Malaika wakwa Lesa, uyo uwatangilile inkambi yakwa Israele,” Acili pano.

*...malaika wakwa Lesa, uyo uwatangilile inkambi yakwa Israele, aselele kabili nokuya kunuma yabo; ne ntumba ye kumbi yaile ukufuma ku ntanshi ya cinso cabo, nokwiminina kunuma yabo: (nangu, yaile ukufuma pano, kabili yabwelele ukwisa iminina pano; shibukombe munshita ya bwafya.)*

<sup>132</sup> Ilyo ubwafya bwatampa ukulolenkana naiwe, ukulwala ku kuboko konse, ubwafya, Malaika wakwa Lesa alesapo, alaya nokwiminina pakati kobe no bulwele, nokwiminina mulya mu nshila, ukubecanya na iwe ukusenda i Cebo cakwa Lesa.

<sup>133</sup> Lesa apele Israele ubulayo, ukutila kuti baya mu calo. Bali milioni umo, limbi, uwa bantu, abaleisa, ukubakonka nokubabutusha, nokubakomaula, kwati libumba lya nama. Lelo Malaika wakwa Shikulu, Uwali palya ukubasenda ku calo ca bulayo, aimine ukufuma munkambi nokuya iminina pakati kabo nobwafya.

<sup>134</sup> Alleluya! Acili alecita ico. Ali nokupanga inshila. Oh, Nalimutemwafye Ena palwa ico, bushe iwe tawamutemwa? Ali nokupanga inshila pamulwele onse uwikele pano nombaline. Ena kale alipanga inshila, kabili Naiminina pakati kobe no bwafya.

<sup>135</sup> Kabili Ninjishiba Ali pano inoine inshita. Imwe kuti mwanjita uwapena nga cakutila mulefwaya ukucita ico; Nshili uwashingamwa paco imwe mulanda. Lelo Nabafye uwashingamwa paco Ine nanda, ku cinso cakwa Lesa. Lelo Ulya Uwatungulwile abana bakwa Israele, nga cakutila Nacipingula bwino, pali lulya u Lubuuto ulu mulemona muli ino nshita yabushiku, nangu ulu mumwene pali cilya icikope.

Ndetontonkanya bena nabashimya muno nshita ya bushiku. Ulya Malaika umo wine uwakwa Lesa ali muli cino cikulwa nombaline, ukucitafye bwino bwino ico Yesu acitile muli bulya ubushiku. Ali pano ukushininkisha. Cilyafye ico Acitile lilya, Ali nomba, kabili lyonse ali nokulaba cimo cine. Malaika uwakwa Lesa, ukwenda nokwiminina pakati kesu nobulwele, ukwiminina pakati kesu nemfwa.

<sup>136</sup> Emulandu wine Davidi atile, “Ee, Nangu nyenda mumupoka poka wacinshingwa camfwa, Nshakatine ububi: pantu Imwe muba pamo na ine.” Iicine cine.

<sup>137</sup> Namwiminina palya, Malaika wakwa Lesa aile ku ntanshi ya nkambi yakwa Israele, nokufumyapo, kabili aile nokwiminina pakati kabo no mulwani.

<sup>138</sup> Kabili Malaika wakwa Lesa naiminina, muno nshita ya bushiku, pakati ka muntu onse pano no mulwani. Ninjishiba ico Ndelandapo. Ninjishiba, ilyo njimine pano nomba pa cintamba, ku cinsu lya ili ibumba linono ilya bantu muno bushiku, Ninjishiba ukutila Lesa nailangisha ukucilapo, ukwisa ukufuma mu Bukata, kabili naiminina na muli cino cikulwa nomba. Nga cakutila imwe kuti mwafwaya ukufuma mu Cebo cakwa Lesa, mumone nga cakutila Ena teti ende kuntanshi yenu. Moneni.

<sup>139</sup> Kabili Ena aishile pakati ka nkambi na bena Egypto. Aleisa pakati kobe no bulwele bobo. Naiminina pakati kobe ne membu shobe, nombaline. Mulandu nshi? Tuli mukufuma ukwa Chalichi. Egypto lyonse aleitwa isonde, kabili lintu Israele afumine. . . Ibukisheni, bali niba membala bamu chalichi kulya kwine. Lelo panuma ya mulopa ne cikonsolwelo fyapangilwa, bali abasembululwa abakwa Lesa.

<sup>140</sup> Kabili ukusembululwa, ileelo, lubatisho lwa Mupashi wa Mushilo. “Bonse,” batile Stefani, “imwe bonse mwebashasembululwa mu mitima na mumatwi, mulandu nshi imwe lyonse mukanina Mupashi wa Mushilo? Nga fintu ba wisu bacitile, naimwe eflyo mucita.” Mupashi wa Mushilo asembulula mumutima, ukuputula ifintu fyonse ifya mwisonde. Cali emicitile iyakale iyachalichi ca holiness ico caikelemo, yacitile kwati ni cena, nokwikala nga cena. Lelo, ileelo, cena caba fye kwati li sonde lyonse ilyashala. Cansoni. Ifwe tulafumyapo ubucingo.

<sup>141</sup> Munyina umukalamba Spurgeon alelanda ukutila, cibusa wandi kashimikila uwa mu Methodisti, aleimba ulwimbo:

Tulalekelako ubucingo, tulalekelako  
ubucingo,  
Tulomfwana no lubembu.  
Tulalekelako ubucingo, impaanga shafuma,  
Bushe imbushi shafumine shani?

142 Pantu mwaponеше ubucingo! Efyo cali. Mwaleka umulingo wa bwikashi wa bwina Kristu, pantu ama seminale yafumishe bakashimikila abanono kabili batuminwe nokuya umfwana ne Cine. Lelo Mupashi wa Mushilo lyonse alabapo ukususha ulubembu, kabili namuno nshita yabushiku naiminina pakati ka wacetekela nefintu fya mwisonde. Ameni.

*Kabili ena aishile pakati ka nkambi ya bena Egypto kabili ne nkambi ya bena Israele; kabili lyena lyali likumbi ilya fita kuli bena, lelo lyena lyalepela ulubuuto munshita ya bushiku kuli abo: pakutila umo tekuti ese mupepi kuli bambi mu nshita yonse iya bushiku.*

143 Lolesheni, icintu cimo cine ico icapelwe kuli *ili* ibumba lya bacetekela, Ulubuuto, lyapofwishe *bena*.

144 Nacilungama, fwaleni amajaketi yenu aya kucingilila ubusanso. Ulu ululeisa. Lolesheni, umuntu onse uyo uukana u Lubuuto alaba impofu kabili enda mumfifi pantu iwe wakana ukupokelela u Lubuuto. Ameni. Lesa alatuma bakapyunga abo abashimikila i Mbila nsuma. Alatuma ifishibilo ne fipasha mano pakati ka bantu, ukushininkisha Cena ukuba i Cine; kabili abantu balakana Cena, takuli nangu cimo icishalapo kanofye imfifi kuli iwe. Wende mu Lubuuto ilyo u Lubuuto lulebengeshima, munyina wandi. Pokelela u Lubuuto. Kristu e Lubuuto. Naisa mukubusha u Lubuuto kuli iwe. Lelo bonse abo abakana u Lubuuto bapokelela imfifi. Kabili umwaume onse nomwanakashi, muli ino nshita yabushiku, uyo uwakana u Lubuuto, aleenda mumfifi, teshibe noko aleya. Aleya alempenuka nganshi, uwaishibikwa ku bantu, lelo nasunguka ifyo eminine Mukubapo kwakwa Lesa.

145 Moneni ico! We cintu we icakusungusha pano. Ali Lubuuto kuli umo, kabili nimfifi kuli umbi. Abena Israele, nomba, panuma Mose apepele, baikele mu mutende. Nomba moneni.

*Kabili Mose atambalike ukuboko kwakwe pali bemba; kabili SHIKULU alengele bemba ukupatukana ukupitila mu mwela uwa maka wakukabanga ubushiku bonse, nokupanga bemba ukuba pa mushili uwauma, kabili na menshi yapatukene.*

*Kabili abana bakwa Israele baendele ukufika na pakati ka bemba pa mushili uwauma: . . .*

146 Nga cakutila kuti mwamona, ilyo abana bakwa Israele, balya abafumine mumfifi kabili bapokelele u Lubuuto, lintu bali mubwafya, u Lubuuto lwapilibwike. Kabili balele ubushiku bonse. Kabili ilyo bena balele, Lesa aletuma icimwela, ukupupa ukuya ponse pali bemba, ukwisula inshila iya kufuminamo.

147 Alleluya ku mwana wa Mpaanga! Ndi uwansansa nganshi ukutila Ine ninjisulamo no Mupashi wa Mushilo, muno bushiku. Ilyo ifwe natulala, tulesangalala, tuletusha mu bulayo bwakwa Lesa!

148 Lesa abalaile, ukupanga inshila yakufuminamo. Kabili ilyo bena baletusha pali ubu ubulayo, Lesa ali palya, kuli bena, aleisula inshila.

149 Umwaume onse no mwanakashi, muno bushiku, uyo uwalapokelela Yesu Kristu pali ifyo ifikomo; Mupashi wa Mushilo, ilyo iwe ulele, ilyo iwe uletusha mubulayo Bwakwe. Limbi iwe walilemana; limbi iwe uli mpofu; limbi iwe taumfwa; limbi iwe taumona; limbi naulwala; ubwafya bwa mutima, ipwalonda, nangu icintu cimo, ulelwa. Pokelela u Lubuuto, muno nshita ya bushiku, kabili tushisha pali Lwena.

150 Kabili icimwela, cileisa kwati cimwela ca maka icilebutukisha kwati nipa Bushiku bwa Pentecosti, walaenda ukupita mulya nokwisula inshila kuli iwe, alleluya, iyo uwalapita mumupoka poka uwakulwala, nokukubwesha mucalo cabumi nakabili. Iwe walapita muli cilya icalo catalala, icabafye, icafumishiwapo amaka, bukapepa ubwaibela; uwaisushiwamo no Mupashi wa Mushilo, uwansansa, uwasagalala, umutima uwaisulamo ukusangalala.

151 Lesa alalangisha amaka Yakwe, kabili alelangisha yena. Njeleeniko, Ndebilikisha. Ukulangisha ubulubulo ukupitila mumaka. Alangishe umulopa kulya, pa cintu cimo. Alelangisha amaka Yakwe pano, ukupitila mu Mulopa Wakwe, ukupitila mu bulubulo. Alelangisha amaka Yakwe aya kufuminamo kumfwa, ukupitila mu mulopa. Alangishe amaka Yakwe ayakupanga inshila yakufuminamo, ukupitila mu bulubulo bwa maka.

152 Kabili, ileelo, imwe mwebasumine, ameni, imwe mwebapokelele u Mulopa wakwa Yesu Kristu, ukumiwamya ukufuma kulubumbu, amaka ya Mupashi wa Mushilo yali pano ukumitungulula kulubatisho lwa Mupashi wa Mushilo. A Maka yakwa Lesa yali pano ukupilibula imwe ukufuma kukulwala ukuya kubumi. Lesa, aletwalililapo, mukufuma kwa Chalichi Cakwe! Cileisa mukubalula, apo Lesa ali nokukolonganya, panuma yakashita, ulubuuto Lwakwe. Icisuma, ukufuma mu mfifi, ukuya mu Lubuuto lwakupapusha! Ifyo twatemwa ico! Ico Natemwa! Ifyo ico cilepilibula ku mweo wandi, muno nshita ya bushiku! ba Cibusa, imwe. . .

153 Nacilalanda ku muntu ileelo, uyo uwacinkumanya ilyo Nacilafuma. Kabili acitila, “Ndesha ukweba imwe mwe bantu.” Acitila, “Nalicinja apakalamba, Billy, ukufumafye ilyo wali umwaice.” Acitila, “Waleisa mupepi nokunjeba, pa ncende yandi iya makwebo, ukutila Ndefwaya ukuba uwalungama na Lesa, Mfwile naba uwalungama na Lesa.” Kabili acitila, “Nalekuseka. Lelo,” acitila, “Billy, ifintu fyalicinja nomba.” Acitila, “Ninjishiba nomba paco ulandapo.”

Nacitontonkanya ukutila, “Lesa Alumbaniwe!”

154 Acitila, “Ndesha ukweba bambi palwa ico,” kabili acitila, “bena kuti bacinja ifyo balelandapo nokwisa landa pepepala

lyakusekesha nangu icintu cimbi. Oh, ico te ine. Uyu umuntu umo uuli mulusoso, limbi kuti afwa. Eukonkelepo. Limbi inambala yakwe eikonkelepo, ukukana ishiba ni nambala nshi iya walakonkapo.” Limbi kuti yaba yobe, muno nshita ya bushiku, cibusa. Iyi limbi kuti yaba ni nshita yakwa Lesa iyakwita imwe.

<sup>155</sup> Lesa, Mupashi wa Mushilo uukalamba, eminine pano muno nshita ya bushiku, pakati kamfwa no Mweo; eminine pano muno bushiku, pakati ka kulwala no bumi. Ninjishiba ico Ndelandapo. Ico nacilungama. Pano pene nomba, Mupashi wa Mushilo umo wine untu uleumfwa nomba, ku muntu onse uwafyalwa cipya cipya ali uwaishiba ukumfwa uyo u Mupashi mu mputule. Iwe tekuti ucafwilishe. Nga cakutila naukwata u Mweo uuli onse, nawishiba ukutila Ena ali pano. Nacilungama.

<sup>156</sup> Ifyo caba nga magneti, lintu yena... Lintu magneti mukalamba aleisa mupepi ne cintu, cilatampa ukusela no kwenda, (mulandu nshi?) nga yaba mupepi ilekata. Kwati nga magneti ikalamba yaisa pano, pa nshita imo, pa Hammond, Indiana. Nalebamona balesenda ifyapalwa, panshi. Batintile icakwimya icikalamba; pesamba paishile magneti iikalamba. Kabili bapyangile fyonse ifyapalwa ukufitwala pakati ka lubansa. Kabili ilyo fyalepita, fyonse filya ifyapalwa ifyatintilwe na magneti, ifyela, fyaile nokuya pamo na magneti, panse. Kabili bafumyamo amaka ya ciko, bafiponeshe mucilibeseni, nokupangamo nakabili. Mwali ifyapalwa ifya aluminumu ifingi ifyashleko. Natile, “Mulandu nshi fyena tafyacisendelwa?”

Atile, “Fyena tafikatwa kuli magneti.”

<sup>157</sup> Natile, “Lesa Alumbaniwe.” Natile, “Mulandu nshi ifi tafyacisendelwa, pano, ici iciputulwa ca cela?”

Atile, “Nga kuti wamona, cena calikakwa panshi.”

<sup>158</sup> Kabili efyo cili palwa bantu abengi muno nshita ya bushiku, ba cibusa. Imwe mwaliba ba membala bamu chalichi, lelo tamwatintwa ukupitila mu lubatisho lwa Mupashi wa Mushilo. Nomba ninshi mwaleka icintu cimo camikakila panshi, ifya kupusana fimo, filamikakila panshi.

<sup>159</sup> Lelo ubushiku bumo muli ishi inshiku, kuli iyi magneti iikalamba iileisa ukufuma ku Kabanga, ileitwa u Mwana wakwa Lesa, uyo uuli nokupyanga pali ici calo. Kabili no muntu onse uwafwila muli Kristu ali nokwima pamo na Ena, ukuya kwi shilya. Kabili iyi imibili iyakale ikapilibulwa no kupangwa mumibele Yakwe, ku mubili Wakwe Wine uwa bukata, umo tukekala umuyayaya no muyayaya, ukuba abantungwa ku kulwala, ukuba abantungwa ku kukota, ukuba abantungwa ku fintu fyonse fimbi; kabili mu Bukata bwakwa Lesa, ukwikala Mukubapo Kwakwe ukwa palwa. Ameni. Mwileka ico cimitinye. Naumfwa uwa bukapepa nombaline. Icine cine efyo ndeumfwa. Nacilungama.

<sup>160</sup> “Pantu Nalishiba ukutila umulubushi wandi ali no mweo, kabili panshiku shakulekelesha Akeminina pali lino isonde; nangula imyambo yamunkanda yamubili wandi yaonaula uyu umubili, cibe mumubili wandi Ndi nokumona Lesa; untu Nkamona palwandi ne mwine; amenso yandi yakamumona, kabili te yaumbi.”

<sup>161</sup> Mwitontonkanya ukutila Nimpena. Nshapena. Nga cakutila Nalipena, ndekenifye neka mbe. Naliba uwansansa muli iyi nshila ukucila ifyo Nali mu nshila imbi. Ee, mukwai. Lekeni injikalefye muli iyi nshila. Oh, icine cine, “uwapena,” kwi sonde, pantu, filya ifintu ifyo isonde lita ifyapena, Lesa afita ifya palwa. Iwe taufwile “wamoneka uwamano,” kuli ili isonde, pantu (mulandu nshi?) iwe tauli uwa muli ili isonde.

<sup>162</sup> Lintu waabuka ulya umushilwa uwa kupatulula, ulaba umwikashi munankwe uwa mu Bufumu bwakwa Lesa. Oh, owe! Cawama shani? Mulandu nshi, iwe waba icibumbwa cipya, (oh, owe) ukucinja ukufuma kuli ici ico uli nomba. “Imwe nomba muli abana bakwa Lesa. Nomba ifwe natwikala capamo mufifulo fyamu Myuulu.” Te, “tukekala,” mu myaka Ikana limo. Emo twaba nomba, pali inoine inshita tuli bana bakwa Lesa. “Nombaline natwikala capamo mufifulo fyamu Myuulu, muli Kristu Yesu,” temu chalichi fye, “lelo ni muli Kristu Yesu.”

<sup>163</sup> Shikulu Yesu Uwabuka kubafwa ali pano. Ali pano mu maka Yakwe. Ali pano mu maka ya bulubulo Bwakwe. Ali pano mukutufumya. Ali pano ukuleta membala onse uwa muchalichi mwisenge pamo na Ena. Ali pano ukuleta umubembu onse, temulandu nefyo wingaba uwapanshi, Ali pano ukuleta amaka yakubuka Kwakwe mu mweo obe nokukupanga icibumbwa cipya.

<sup>164</sup> Pano, imyaka iinono iyapitapo, bonse bukapepa ubwa mwisonde bwalikumene, Ndecetekela cali ni mu London, ku England, nangu kuncende imo. Nshileibukisha bwino bwino. Lelo, lintu bonse balelanda mumachalichi ayalekana lekana, ba Mohammedi, naba Buddha, nafyonse ifintu. Panono... isenge ilyo ilyaiminineko ichalichi caba Holiness mu America, icakwa John Witt, Nincetekela, elyali ishina lyakwe. Eico lintu aiminineko, munshita yakwe iyakulanda, bonse bakapepa abaiminineko muli uku ukulongana ukukalamba, alandile pa lyashi ilyakwa Namayo Maccabee, ifyo aali uwapanshi; bamwikete mu Oklahoma, nacifwaka capombwa icikalamba mukanwa kakwe, aleensha... nangu ukubweshwa ukubutukisha, aleya alepita mumisebo neceleta lyabakabalwe. Acitile ukwipaya ukwingi, kabili nefyabipa nganshi, kabili uwabipa nganshi, mpaka, lintu baile mukubika amanenekela na masako pali ena, bafililwe nokubika amaboko yabo pali ena, batinine ukukoweshiwa.

<sup>165</sup> Kabili alondolwele ili ilyashi munshila iyakupapusha,



mpaka kakutika onse aikele pampela yafipuna fyabo. Atile, “Bashimucindikwa, bakapepa bamuli ili isonde, bushe bukapepa bwalikwata icili conse icingawamya amaboko yakwa Namayo Maccabee?” Tapali nangu umo uwalandile ishiwi. Atolokele mu muulu mu mwela nokupanta ifishinshilo fyakwe capamo, nokutota amaboko yakwe. Atile, “U Mulopa wakwa Yesu Kristu tekutifye uwamye amaboko yakwe, lelo Uli nokuwamya umutima wakwe.” Ameni. Ico nacilungama.

<sup>166</sup> U Mulopa wakwa Yesu Kristu uli nokubula cilende uwa shalikishako mu Louisville, Kentucky, nokumupanga namayo, uwashila ukufuma muli ena. Nkabula bampula mafunde ukubafumya mucifulo cabo kulya kwi shilya, nokupanga ba shimucindikwa ukufuma muli bena, kabili nokubapanga abashila bakwa Lesa.

<sup>167</sup> Ba cibusa bandi, abekashi bamu Bufumu, mwe bantu banandi aba mu Kentucky na Indiana, nokushinguluka konse, mwitontankanya, mu nshita ino iya bushiku, yena ni nshita yenu ukutontankanya pali uyu Shikulu Yesu, iyo inshita yenu iyakulekelesha tailapwa?

<sup>168</sup> Lintu, mwamona i Chalichi cileya muli uku ukufuma ukukalamba, mwamona i Ntumba ya Mulilo iletungulula ku ntanshi yesu; naiminina, ilecita ifisingusho ne fishibilo. Ali pano, muno nshita ya bushiku, mu maka Yakwe yonse aya bulubulo. Ali pano nokumyundapa, umubembu onse, ukubwekeshamo uwapona onse. Ali pano ukundapa umulwele onse.

<sup>169</sup> Ena e Mbila nsuma yamwisulo. Kabili tushimikila i Mbila nsuma iya mwisulo; nokulya i Mpaanga yonse. Nokukanga Yena pamo na Mupashi wa Mushilo, kabili mufwile mwaishiba ukutila Kwena kulya kusuma, pantu Mupashi wa Mushilo nakwata amaka ya bulesa kuli ifwe ukutila Cena cakulya icituntulu. “Sondeni nokumona ukutila, Shikulu musuma. Omfwika kwati buci mucilibwe.”

<sup>170</sup> Shikulu Wesu Yesu pano, mukutemwa Kwakwe na maka, mu mapalo Yakwe ayakalamba aya bulubulo! Oh, ifyo Aleiminina pakati ka chalichi no lubembu, muno nshita ya bushiku! Ifyo Eminine pakati kobe no bupingushi; alesuma umulopa, alepepa!

<sup>171</sup> Pano tapapitile inshita iitali, Naendele ukuya mu ncende pano mu Ohio, umo Nalifye nokulanda itontankanyo lyandi pa bupingushi. Nalelya pacikulwa icakulilapo cinono icaba Dunkard. Twakwete ukulongana ukukalamba. Naikela ba mailoshi abengi kunse mu calo, pa ng’anda ya beni inono. Nalilila mu cikulwa cakulilamo ica ba Dunkard; abantu abasuma nganshi, kabili pa Mulungu baisele nokuya ku chalichi. Naile mu ncende iinono iyabafye, iyaseka, incende ya bena America ukuyalya icakulya ca cungulo candi.

<sup>172</sup> Lintu Naendele ukwingila pamwinshi, kucakupapusha candi, palya paiminine kapokola wabuteko namaboko yakwe nayakumbatila umukashana, baletya amangalo yapali fi mashini. Nomba, injuka shalileshiwa mu Ohio, kabili kulya umuntu wa mafunde palwakwe euletoba ifunde. Kabili limbi, ali umuntu uwa pa mushinku wandi, limbi alyupile, nolupwa lwakwe ku ncende imo; na maboko yakwe nayakumbatila namayo umwaice beminine palya.

<sup>173</sup> Naloleshe ukuya mu cikulwa cakulilamo, abalumendo bamo baikele kulya, nabakolwa, kabili na namayo umwaice talecita ifya mibele isuma iyo. Naloleshe, ninjikala panshi, kukuboko kwandi ukwakukuso pano, mukayanda bashitishishamo. Umo, Nali uwaipekanya ukwikalamo.

<sup>174</sup> Mulya mwaikela namayo umukalamba, ukuba pawa myaka amakumi yasano nacine konse konse ukuya kuwa myaka amakumi mutanda iyakufyalwa, uwakulile nga mayo wandi; aikele palya, inkanda iya nkanshi konse, nafwala nakakufwala akanono. Kabili, oh, cali icabipisha. Kabili namala yakwe yapentelwe icakashikilila, imilomo yakwe yapentelwe ica kashikilila, icabipishe mukullosha ico tawatala aumonapo. Umushishi wakwe waputwilwe uwipi icine cine kabili uwakakwa pamuulu *ngefi*. Kabili alenwa.

<sup>175</sup> Palya paikela abaume babili pamo na ena, baikele palya, abalemonekafye bubi bubi, nabakolwa, naumo pali bena alele ukulambalala pa mbale shape tebulo. Kabili lintu balombele ubwelelo ukufumapo, bafumine baya mu muputule wakuyafwilishamo . . .

<sup>176</sup> Naiminine palya. Natontonkenye ukutula, “O mwe Lesa, kuti Mwashipikisha shani kuli ico? Kutu Mwalolesha shani pa cintu icaba ifyo? Lintu, mu mutima wandi, Ndi uwabipa nga fintu Ningaba, cibe, Ncili ndetontonkanya nga cakutula umunono wandi Sarah na Rebekah bali noku kulila mu nkulo yaba ifi nokumona cilya icileisa. Shikulu, Mulandu nshi tamwinga fumishapo pa cinsu ice sonde eflyo natontonkenye?” Natontonkenye ukutula, “Mulandu nshi Tamwinga citila ico, Shikulu?”

<sup>177</sup> Naikaleko panshi palya kabili natampilekofye ukulila. Namwene icimonwa. Namwene, nga fintu calo, isonde lileshinguluka mu mwela, kabili palya paiminine umukola mfula ukushinguluka lilya isonde. Kabili umuntu umu ulya uwalelanda kuli ine, atile, “Ulya e Mulopa wakwa Yesu Kristu, ukushinguluka ili isonde, ico ecilelesha Ena ukuyonaula. Nga cakutula Lesa kuti amona ulubembu, ‘Ubushiku walyako eico, bulya e bushiku ukafwa.’ Umuntu onse uuli pe samba lya ulya u Mulopa palya, nakwata a . . . ukusala kwakwe umwine, ukubula ubusalo bobbe. Lelo nga cakutula wafwa, no mweo obe waya

ukucila pa luse lwa ulya u Mulopa, iwe kale kale naupingulwa ilyo taulafika kulya. Tapali nangu cimo icishele pali iwe.”

178 Nomba Naimwene nemwine palwandi. Namwene Shikulu wandi Yesu naiminina palya, ne cilongwe ica myunga pa mutwe Wakwe, kabili ne filamba filekonkoloka panshi, nafisankana no mulopa, nga fintu wena wanukwilwe ukufuma ku myefu Yakwe. Kabili Namwene imembu shandi shileya kuli Ena, kabili ne nshita yonse ilyo shena shaleisa kuli Ena ngefyo, [Pali tepu tapali amashiwi—Kale.] . . mpaka Aletutuma. Imyunga yalashile pa pipeni peni Fyakwe, nokucilapo. Alempempenukila kunuma. Aletila, “Taata, mweleleni, pantu teshibe ico alecita.” Kabili nakabili kuti Nacita icintu cimo cine, nomba kabili u Mulopa Wakwe wali kwati cisoleda ca kuli motoka, ukucingilila motoka, ukucingilila Ine ukufuma kubukali bwakwa Lesa, neushalingile.

179 Kabili Naishile kuli Ena, panono panono, nafukeme panshi kuli Ena. Natile. . . Naloleshe panshi palya, iyalambalele kuntanshi yandi, kabili kwali ne buuku ilyakale ilya lubembu, kabili ne shina lyandi lyalembelwe pa muulu. Natile, “Shikulu, bushe kuti Mwanjelelako?”

180 “Icine cine,” Atile, na menso ayakutemwa; yafikile ku lubali Lwakwe, abulile u Mulopa afumya, kabili alembele pali cena, “Uwaelelwa.” Nokuciposa muli Bemba Wakulaba. Atile, “Nomba. . .”

Natile, “Na Mitotela, Shikulu.”

181 Atile, “Nomba, Nakwelela; kabili naiwe ulemususha ena.” Oh, ico cacinjishe icikope, kuli ine.

182 Ine—Ine nafumine muli ico. Naendele ukuya kulya nokwikalako panshi pali ena, natampile nokulanda. Kabili aikele ubwikashi ubwa afya munshita yakwe. Natile, “Bushe tawatala aubapo umwina Kristu?”

Atile, “Nakulile mu ng’anda ya bena Kristu.”

Kabili Natile, “Cinshi cacitike?”

183 Anjbele palwa bwafya bakwete no mulume wakwe, kabili nefyo abana, nefyaba ngefyo. Natile, “Yonse, yonse iyi imyaka, tawatala awikalapo uwamutende ukutulafye apo wakumanishishe Lesa?”

Atile, “Mukwai, e cine.”

Natile, “Bushe tekuti umupokelele Ena nombaline?”

Atile, “Bushe kuti Ansenda?”

Natile, “Alekonkonsha pa mutima obe nomba.”

184 Kabili ukufuma muli kalya akalituka kanono aka kushitishishamo, palya panshi, afukemeko ku cinso ce bumba lya bantu; fi mashini fya mangalo fyalekele, ukulanda ukwa kutipa kwalekele, kabili ne fintu fyonse fimbi. Kabili Naimishe

amaboko yandi, kabili amaboko yandi... kabili na yalya amaboko aya nkanshi, kabili namutugulwile kuli Yesu Kristu. Ico nacilungama. Ifyo efyo cali, mwe fibusa. Tamufwile ukulolesha... Yesu...

<sup>185</sup> Nshilesakamana pafyo wacita, ifyo imembu shobe shaba ishafita, ifyo umweo obe waba nefiko; Lesa naiminina, muno nshita ya bushiku, alekonkonsha pa cibi ca mutima obe, ukukwelela, temulandu nefyo waba.

<sup>186</sup> Natukonteke imitwe yesu pali mineti imo. Nkashi, iseni pa cinanda palya, bushe kuti mwacita ico?

<sup>187</sup> Taata uwa mu Myuulu, oh, Napepa ukutula Imwe fye nomba... ilyo Mupashi wa Mushilo alepitana mucikulwa. Leken i tufwaye mukubalilapo u Bufumu, tusange ububile kuli Imwe, nomba Nincetekela ukutula Mwalaundapa abalwele. Lelo nombaline, Taata, ilyo tuleumfwa ukutula pali ukukalamba, ukukabila kwa shika kabili nokushininwa, abantu ukwishiba ukutula i Chalichi Cenu cili mukufuma, kabili tuleya ukulola ku Bupingushi. Mukukana ishiba lelo, mu lucelo, umuntu umo kuti aisa ku busanshi, kabili ifwe natulala palya, natusendwa. Ngeyi nshita, mailo ubushiku, limbi kuti twaba umwakusungila ifitumbi ku ncende kumo, kabili ne myeo yesu ili kwi shilya mu Muyayaya.

<sup>188</sup> O mwe Lesa, iyi limbi kuti yaba ni nshita yakulekelesha! Iyi limbi kuti yaba ni nshita iya kulekelesha iyo umuntu enga kwata. Abengi, ukwabula ukutwishika nabekala pano, abaume na banakashi, abo abalekabila, abo abaikalafye ubwikashi ubutuntulu ubusuma, lelo tabatala abafyalwa cipya cipya, tabaishiba ifyo cipilibula ukwisulamo na Mupashi wa Mushilo, umweo uwakulapila uwa pwililika; ne mnyololo yonse, ifya nsoni, ukutula fyalifumishiwa pali bena, kabili Umupashi wakwa Lesa wabatishe bena ukwingila mu luse Lwakwe.

<sup>189</sup> Taata, Mwebatemwikwa, bushe Tekuti muno nshita ya bushiku, mwi Shina Iya Mwana Wenu uwatemwikwa, Yesu, muye ku mutima onse nokulandafye nomba? Kabili lekeni bena, mukuicefya kwa mitima yabo, bemye amatontonkanyo yabo kuli Imwe, bemye imitima yabo nokutula, "Ndi Pano, Yesu. Mbuleni nomba, pamofye ngefyo Ndi, kabili mu mumba nokumpanga icintu cimo icapusanako. Mpangeni mu musango wa muntu Imwe mwingafwailamo ine ukuba. Ukuya monse mu mweo wandi, Imwe namulanda kuli ine. Iwe namulanda kuli ine. Namweshwa ukumbula nokucita icapusanako. Namweshwa ukunenga ine ukupanga uku ukucimba. Lelo nomba akasuba nakawa, Shikulu, pamo na ine, lelo Ndi uwaipekanya ukwisa nomba." Fikilisheni ico, Taata. Ilyo uluse luleita, ku cinso ca Bupingushi; ukufuma ukwa Chalichi, kulefuma mu Egypto; lekeni bese, ukuya pamo ne bumba ilikalamba, abaitwa ukufuma. Twaipusha ico mwi Shina Lyakwe.

<sup>190</sup> Kabili ilyo tukontamike imitwe yesu, na menso natwisala, kabili abena Krisstu balepepa, kuti Nafwaya nga cakutila imwe fye kuti mwaimyako ukuboko kwenu, nokutila, “Munyina Branham, iwe njibukishako. Ine—Ine nincetekela icebo conse ico ulelanda e Cine palwa kwa Yesu Kristu. Kabili ifwe bonse tulekabila ukwisushiwa no Mupashi, kabili, Nshilati, nomba. Naliba membala wamu chalichi.” Nangu, limbi iwe tawatala auba, nakalya. Nalimo limbi waliba umubembu, tawatala aupokelela Kristu. Nangu, waliba membala wamu chalichi, kabili tawafyalwa cipya cipya. Bushe kuti waimyako ukuboko kobe, nokutila, “Njibukisheniko ine, Munyina Branham, mwipepo lyobe. Ndefwaya ukuba uwalungama.”

<sup>191</sup> Lesa amipale. Lesa amipale, na iwe, na iwe, iwe, iwe; na iwe, munyina; na iwe, nkashi; na iwe, munyina; iwe, iwe, iwe, munyina, nkashi. Naumfwa.

<sup>192</sup> Oh, ukuya ku kuso kwandi, nibanga kuno? Imya ukuboko kobe, utile, “Njibukisheniko ine, Munyina Branham, Ndefwaya ukufyalwa.”

<sup>193</sup> Nomba, ibukisheni, Mupashi wa Mushilo alelanda kuli imwe. Nga cakutila Ine ndi mubomfi wakwa Lesa, Ninjishiba, mucine cine ngefyo Njiminine pali cino cintamba, ukutula Mupashi wa Mushilo alelanda ku mitima pano. Bacibusu, Ine limbi kuti naba uwaibela kuli iwe, lelo Nshili uwafulungana. Ndeshiba ico Ndelandapo; nga cakutila Naishiba ubwafya bobo ifyo buli kulya, kabili nefyo ubulwele bobo buli, kabili na Lesa aumfwa ipepo lyandi pali iwe... Kabili nombaline muli cino icikulwa namwikala abantu abo abaundapwa, nepwalonda, nobupofu, na bucibulu, nokulemana, ne fintu fyonse fimbi, lolesheni pakulongana konse ukushinguluka isonde. Nga palwa iwe nomba? Nga palwa ico nomba? Nga cakutila kuti Aumfwa ipepo lyandi palwa ico, bushe tekuti Omfwe ipepo lyandi pa mibele yobe iya mweo obe? Nga cakutila kuti Asokolola kuli ine apo apali ubwafya bobo, bushe tekuti Asokolole kuli ine nomba apo ubwafya bobo buli, napamo?

<sup>194</sup> Nomba abengi ukucilapo nabemya amaboko yabo, baletila, “Munyina Branham njibukisheniko ine. Ndefwaya, pali ino nshita, ipusha Lesa ukuba uwaluse pali ine”? Lesa amipale, na iwe, na iwe, iwe, nakabili. Oh, owe, cilifye konse mucikulwa, pa ncende yonse!

<sup>195</sup> Ilyo mukontekeko imitwe yenu. Ndetontontokanya nga cakutila imwe mwebemisheko amaboko yenu mwakwatafye ukusenamina ukunono ukwacilapo, mutile, “Shikulu, Nalikwata ukusenamina ukukalamba ukwa kwimya ukuboko kwandi, mpeni ukusenamina ukukalamba ukwa kwimininako ilyo alepepa. Nga cakutila Aisa kuli ine, ilyo takalawa, Shikulu, ici ecishibilo candi kuli Imwe, icakutila Ndefwaya ukuba uwalungama. Ndefwaya inka Mikumanye ubushiku bumo. Uku

ukukola kukesha pali ine kabili Nkafwa. Dokota akafumapo pa busanshi bwandi; tapali icinga citwa. Nomba, Lesa, kwateni uluse pa mweo wandi. Ilyo fube fube iyatalala iyamfwa ileelela mu muputule, lekeni ubwato ubwakale ubwaku Zioni, bukese nsenda. Nkeminina, Shikulu. Cikasenda ukusenamina ukwingi, lelo Icintu cimo cilensesha kabili. Ninjiminina.” Lesa akupale, munyina.

<sup>196</sup> Umuntu umo umbi eminine, nokutila, “Ninjiminina, Shikulu.” Lesa akupale, munyina. Lesa akupale, munyina, nkashi. Twalililenifye ukwiminina. Umuntu onse uulefwaya ukwibukishiwa muli ili ipepo, pe pusukilo ilya mweo obe, bushe kuti mwamininako. Lesa amipale. Lesa akupale, we mulumendo. Lesa amipale, mukwai. Lesa akupale, munyina. Lesa akupale, nkashi yandi. Lesa akupale, nkashi; iwe, munyina.

<sup>197</sup> Umuntu umo umbi eminine nomba nokutila, “Ine ndi Pano. Munyina Branham, Ine nshiminine ku cinso cobe, Njiminina ku cinso cakwa Lesa. Icintu cimo nacinjeba ukwimininako, kabili Naiminina.” Bushe kuti wacita ico? Imininafye pa makasa yobe. Iwe sendafye Lesa ukufika apa. Lesa akupale, namayo.

<sup>198</sup> Pali ifingi ukucilapo. Lesa akupale, namayo. Ico nacilungama. Namayo umulanda naikatilila umwana wakwe umunono, aleesha ukwimako, ne filamba mu menso yakwe. Bushe tekuti wise? Imininako nakabili. Lesa akupale, namayo, namayo umukalamba naiminina kulya, kabili mukalamba umwine mwine, naishiba ukutila afwile alolenkana na Lesa, pali bumo muli ishi inshiku. Lesa akupale. Ninani uwalamininako uwalakonkapo nomba, tila, “Nalamininako”?

Twalililenipo ukwimininako kwipepo.

<sup>199</sup> Umuntu umo umbi? Ndeumfwa fye kwati kuliko umuntu umo umbi uulefwaya ukwiminina. Limbi ulefwayafye ukupalaminako mupepi panono. Wicifumyapo nakabili. Imininafye. Bushe kuti wacita ico? Imwe bamo mwebalefwaya ukupalamina kuli Lesa. Lesa amipale. Ico nacilungama. Kuti umuntu umo . . . Lesa akupale, namayo. Ee, mukwai.

<sup>200</sup> Kuliko nalimo abantu batatu na bambi, abo Ntontelepo amenso, abafwile baimininako, pantu palya napeminina Malaika wakwa Lesa. Lesa akupale, namayo. Ico nacilungama. Nomba, nacilungama, munyina, nga palwa ico? Cisuma. Kabili, Malaika wakwa Shikulu naiminina, Ninjishiba. Nimumona Ena, kabili Ninjishiba ukutila umuntu umo afwile aiminina uwalungama nomba. Nalalolelakofye miniti imo naimbi. Leken i Lesa . . . Iwe nawishiba ukutila Aletitikisha pa mutima obe. Naiminina palya, cibusa wandi. Ena Eulya alekweba nomba ukwimininako. Bushe tekuti ucite ico? Imininafye noku Mupokelela, nombaline. Nacilungama.

<sup>201</sup> Bushe uli uwashininkisha nomba? Nga cakutila Lesa akwita muno nshita ya bushiku, muli uku ukulongana; ili isambilisho,

ubu ubwite, buli noku kumanya iwe kwi shilya lintu ukafwa. Cinshi ico wacita palwa ico? Nga cakupitila tawiminine bwino, icine cine, iminina nomba, pakutila Amone ukutula iwe ulefwaya ukupokelela, uleenda mu Lubuuto.

<sup>202</sup> Nomba, Taata wesu uwa mu Myuulu uwaluse, aba abana Benu abatemiwika, aba mitima iyanakila, i Cebo naciponena mu mitima yabo munshita ino iya bushiku. “Icicetekelo cisa ukupitila mukumfwa, kabili ukumfwa ukwa Cebo.” Kabili Imwe kuti mwaumfwa. Kabili Imwe namunasha imitima yabo, abengi nabeminina, abaume na banakashi, abalumendo na bakashana, balelanda Imwe ngo Mupusushi umusuma uwabo kabili Intungulushi.

<sup>203</sup> Kabili lekeni Malaika wakwa Lesa, Uyo uuli pano nomba muno nshita ya bushiku, lekeni Abatungulule ukupita mu mweo. Lekeni babe abatungululwa ku Kalbale nombaline fye, mu mitima yabo, kabili nokupokelela Yesu ngo Mupusushi wabo. Kabili lekeni Mupashi wa Mushilo, ukupitila mu Mulopa wakwa Kristu, ekile pa myeo yabo, nokufumyapo bu caibela, kabili besusheni no lubatisho lwa Mupashi wa Mushilo. Lekeni ubu bube ubushiku ubukalamba nganshi mu myeo yabo. Natwishiba ifyo cili, pantu muno nshita ya bushiku balepokelela Imwe. Fikilisheni ici, Shikulu, nombalinefye. Kabili lekeni baye ku ng’anda ukufuma pano, muno nshita ya bushiku, abansana kabili abasangalala, balelumbanya Lesa, ne mitima yabo yonse. Napepa ili ipalo ukupitila mwi Shina lyakwa Kristu Yesu.

Nomba lekeni Shikulu amipale ilyo muleikalako.

<sup>204</sup> Lekeni imipushe nomba. Cila umu uwa cimininako, kabili namwishiba ukutula icintu cimo nacitika kuli imwe ilyo mwacimininako, imyako ukuboko kobe. Imyafye ukuboko kobe, nawishiba icintu cimo nacitika. Lesa akupale. Lesa akupale. Ico nacilungama. Cena cilingile ukuba, mwe fibusa. Cena cilingile ukuba. Naciminina, ukumona pano nombaline, Malaika umu wine untu Nandapo, aleya alepitana muno mwine mucikulwa pano; Malaika umu wine uwakwa Shikulu, i Ntumba ya Mulilo. Naciba ndeshimikila pali ba mineti bakulekelesha basano nangu ikumi, pesamba lyakusubwa kulya. Ndecumfwa Cena, ukumonafye Ena aleenda ukupita muli cino icikulwa. Nomba, imwe kuti mwatontokanya ukutula Ndelandafye ilyashi kuli imwe, lelo e Cine.

<sup>205</sup> Nomba, Nshiletontokanya ukutula kuti Naita umulongo waba kupepela. Ndetontokanya ukuti Nalaiminina pano pene nokwipusha Lesa ukushininkisha ukutula Nimyeba i Cine, ico nacilungama, ku fishibilo, nefipesha mano.

<sup>206</sup> Nibanga muno abalefwaya ukundapwa, pa bantu abalwele? Imyeniko amaboko yenu, ponse apo muli. Imyenifye amaboko yenu, mutile, “Nacipokelela cena.” Nacilungama.

207 Ndefwaya imwe muloleshe, mwikale, nokucetekela. Umuntu umi muli ili ibumba, ukupitila *pano*, umuntu umo ukupitila *pano*, aloleshefye, nokutila, “Shikulu Yesu . . .”

208 Kwati ngeci. Nincetekela, umulandu Nacipangila cilya icipailo mukubalilapo, tufwile twasanga ububile pamo na Ena. Ici cintu cimo icipya kuli ine. Mfwile nasanga ububile pamo na Ena, mukubalilapo. Nomba nga cakutila Nasanga ububile, kabili nokucita ububile. . . Kabili imwe, mwebengi, nangu babili, imyeo ilesa kuli Ena fye nomba. Icine cine, icine cine. . .

209 Nomba imwe, cila umo pali imwe mwe bantu abesa kuli Kristu, nomba, mufwile mwasanga ichalichi icisuma icaisulamo Mupashi wa Mushilo kabili ufwile waya kuli ico cine. Kabili kulya ufwile wafwaya ulubatisho Lwakwe mpaka wa Lusanga; kuyafye, cila ubushikufye cila akasuba, kutwalilila ukupepafye. Kabili lintu iwe ulelolesha. . .

210 Nomba, imwe mwebalwele. Nga cakutila Nimyeba i Cine, Lesa aleshininkisha ukutila cena e Cine. Ico nacilungama. Nga cakutila kuti wacita ico. Kabili Lesa alacilenga cishibikwe, nga cakutila iwefye wapepa nokucetekela no mutima obe onse. Loleshafye, nokulanda ici. . .

211 Lintu Malaika wakwa Shikulu ankumenye palya pa Green’s Mill, Indiana, imyaka cine konse konse iyapitapo, ukufumafye mukuba umwaice, alenkonka, alenangisha ifimonwa, lintu Naile kuli Ena, Atile, “Nga cakutila uli nokuba uwa cishinka, ukulenga abantu ukucetekela iwe, takuli nangu cimo icikeminina kwi pepo lyobe.”

212 Nomba, Ali nokucita icintu cimo cine kuli iwe nomba nga filya Acitile lilya. Alibuka ukufuma ku bafwa. Kabili Ena. . . kulya ibumba lilefuma ilyo Ena. Naishiba icili pali onse pali imwe, ico mwacita, ifyo ubwafya bobo buli, conse icintu icili pali ico. Bushe namucetekela ico? [Ulukuta lwatila, “Ameni.”—Kale.] Nomba cetekela ico no mutima obe onse.

213 Namona umulumendo naikala pano, nacetekela, ukweshu uku, ukukwata icicetekelo. Bushe naucetekela ukutila Lesa kuti anenga ine ukwishiba ico icilubene pamo na iwe? Bushe naucetekela? Nga cakutila kuti Acita, bushe kuti wapokelela ubundapishi bobo? Naukwata ubwafya bwa ku mutima. Bushe ico tacilungeme? Nga cakutila Nakweba nomba ukutila iwe naundapwa kuli ico? Bushe kuti wacetekela ico? Imininako pali mineti umo. Iwe ukwete umutima uwamwenso, kabili umutima wakuilishanya. Calikucusha pa nshita nomba. Inshitafye imo, lintu iwe walalako panshi, pamo, cilakukama ulapipila, kabili ulakwata ukuyumaula ukwingi kunuma na kuntanshi, ulafilwa ukwenda bwino. Bushe ico nacilungama? Pantu, cena cilenga ukukana sungulika bwino mucifu cobe, ukutila fyena fipite mu mishipa. Bushe ico teca cine? Iwe nomba tekuti usakamane pali



ico nakabili. Iwe bikafye ico ukwete icalungama nomba; kuti waya ku ng'anda naundapwa.

<sup>214</sup> Nshilebelenga amano yenu. Ndi mweni uwapwililika kuli imwe. Niwefye umwaume uwikele palya. Bushe ico nacilungama? Nshatala nkumonapo mu mweo wandi, kabili nshatala ishiba nangu cimo palwa iwe. Bushe ico e cine? Naucetekela ukutila Shikulu ali pano!

<sup>215</sup> Mucishinka, we mulumendo, Ndefwaya nkwapushepo icintu cimo, kabili umone nga cakutila ici ca cine nangu iyo. Patushita fye utunono utwapitapo, ukwabula nokwishiba uko cafuma, icintu cimo iceni caisa pali imwe lintu Natampile ukulanda palwa ico "icakusuma icafumine mu lubola." Bushe ico tacilungeme? Bushe temyumfwile iyeni wakwete, mukwikala palya? Bushe ico tacilungeme? Kabili tamwaloleshe pali ine pali ilya nshita imoine? Lilya line e lintu iwe waundepwe, no bwafya bwa mutima, palya pene. Ameni. Ico cili bwino bwino fye. Ali pano pene.

<sup>216</sup> Nshilebelenga amano yenu, mwe fibusa. Ndelandafye i Cine, kabili na Lesa aleshininkisha cena ukuba i Cine.

<sup>217</sup> Cinshi ico imwe muletontonkanya palwa ico, namwikala palya mupepi na ena? Bushe namucetekela? Bushe namucetekela ine ukuba kasesema wakwa Lesa? Bushe namucetekela nga cakutila Lesa... Imwe mwebekela ku ntanshi, kuno kuntanshi, uyo wine e mulandu Ndelanda kuli imwe ukucilapo, Mupashi ali kunuma kulya, nanshinguluka. Lelo bushe namucetekela, nga cakutila kuti Nalanshanya no mupashi umbi, Lesa alasokolola ico icilubene? Bushe kuti mwapokelela ubundapishi bwenu? Walikwata ubulwele bwa shuka. Bushe ico nacilungama? Imyako ukuboko nga cakutila ico e cine. Imininako pa makasa yobe. Bushe mwapokelela ubundapishi bwenu nomba? Leken Shikulu Yesu Kristu amyundape ukupwililika. Lesa amipale.

<sup>218</sup> Ukwate icicetekelo. Umuntu umo *muno* acetekela. Akwate icicetekelo, no mutima wakwe onse.

<sup>219</sup> Namona umulumendo naikala palya nensuti ya makumbi makumbi nafwala. Palya Nalwiminina pamuulu wakwe. Naukwata ubulwele bwapa nkanda, teifyo, we mulumendo? Bushe ico tacilungeme? Imininako pa makasa yobe. Oh, Namona, iwe uli pamo neli ibumba lya baitwa. Bushe ico nacilungama? Ukuba, bushe ulefwaya ukuya ku ng'anda uwa undapwa? Imyako ukuboko kobe nokutila, "Shikulu Yesu, nomba Nacetekela Malaika wakwa Shikulu alentungulula ukuya kuntanshi. Kabili Nincetekela ukutila Ningundapwa."

<sup>220</sup> Cinshi uletontonkanya palwa ico, we muntu uumukonkelepo kulya, bushe naucetekela, pamo? Imininako pa makasa yobe pali mineti umo, pakutila Ndoleshe pali iwe. Naucetekela ukuba umubomfi wakwa Lesa; no mutima obe onse? Ulefwaya


ukufumamo muli ubo ubwafya bwa mutima? Ico eco wacikwata, teifyo? Ico eco “*wacikwata*,” Nacitila. Taukwete ico nomba. Kabiye ku ng’anda, pamo.

<sup>221</sup> Umuntu umbi uwakonkelepo, cinshi uletontonkanyapo palwa ico, mukwai? Bushe naucetekela no mutima obe onse? Bushe naucetekela ukuba kasesema wakwa Lesa? Imininako pa makasa yobe. Bushe wacetekela nomutima obe onse nomba? Wacikwata umwenso. Bushe ico nacilungama? Mwamona? Bushe ico nacilungama? Imyako ukuboko kobe. Kabiye ku ng’anda uwaundapwa nomba. Yesu Kristu akundape.

<sup>222</sup> Inga uyu umuntu uukonkelepo, iminina, ukuya pesamba mu mulongo, bushe naucetekela no mutima obe onse? Imininako pa makasa yobe. Bushe naucetekela ukuba kasesema wakwa Lesa, ukuba umubomfi Wakwe? Naucetekela ukuti kuti Anjeba icilubene muli iwe, pakutila wapokelela, ubundapishi bobbe? Cena cili mu mukolomino obe. Bushe ico nacilungama? Kabiye ku ng’anda nokundapwa, mwi Shina lyakwa Yesu Kristu.

<sup>223</sup> Umuntu onse umbi muli cino cikulwa, uulefwaya ukundapwa, kuti aimininako kabili alaundapwa. Nga cakutila naucetekela, ngo mubomfi wakwa Lesa, imininako pa makasa yobe. Lesa akupale. Naukwata ubwafya bwacanakshi, lipwa londa, efyo lyaya. Lesa apalwe! Onse umo pali imwe, imyeniko amaboko yenu kuli Lesa.

<sup>224</sup> Mwe Taata wesu uwa mu Myuulu, nomba Nakalipila ubulwele bonse ubuli muli cino cikulwa, natamfya onse umupashi wakowela, kabili lekeni Mupashi wa Mushilo asende intanshi nomba nokundapa umuntu onse.

<sup>225</sup> Bikeni amaboko yenu pali umo no munankwe, kabili mutile, “Shikulu Alumbaniwe,” konse konse. Kabili sangalaleni nokuba abansansa, pantu Yesu Kristu ali pano, umwana wa Mpaanga uwakwa Lesa, pakumyundapa, bonse. 

54-0329 Ubulubulo Ukupitila Mu Maka  
Church Of The Open Door  
Louisville, Kentucky U.S.A.

BEMBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Icishibisho ukufuma ku mwine kalemba

Insambu shonse tashisuminishiwe. Ili buku kuti iya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalemwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)